

19 NOV 2010

20 JUN 2006

88.09

U-33

4

44p.

29

ՏԵՇ ՎԱՐ ԵՒ
25 JUN 2013

9040

100
100
100

ՑՈՒՆԱԿԱՆ

ՔՐԱԿԱՆՈՒԹԻՒՆ

Արևելքից յետոյ այժմ հասնում ենք Արևմուտքի գրականութեան։ Այստեղ առաջին տեղը պատկանում է Յունաստանին թէ ժամանակագրութեամբ և թէ երկերի արժեքով։ Յոյներին հետևել է ամբողջ Եւրոպան, և դեռ այսօր էլ, բոլոր քաղաքակիրթ երկրներում, յոյն զասականները հիացմունքի և ուսումնասիրութեան առարկայ են։ Կարելի է ասել, որ մինչեւ հիմայ ոչ մի ուրիշ ազգ չէ ցոյց տուել գեղարուեստական այնքան ստեղծագործող ոյժ, որքան հին հելլենները։

Ի՞նչն է այդ երևոյթի պատճառը։

Յունաստանի կլիման մեղմ էր, հովիտները պտղաբեր, ուստի և ժողովուրդը, որ բնութեան աղէտների ու խստութեանց դէմ շատ էլ մաքառելու կարիք չունէր, հեշտութեամբ էր ճարում ապրուստ և հետևաբար գտնում ազատ ժամանակ՝ զարգացնելու իւր բնական ընդունակութիւնները, որոնք գերազանցօրէն փայլուն էին։

Նրանք ուրիշ ազգերից (հնդկացիք, եգիպտացիք և այլն) են փոխ առել քաղաքակիրթութեան սկզբնական տարրերը, սակայն, իրենց

կապոյտ երկնքի տակ, բնական նուրբ ճաշակով այնքան են կատարելագործել, ազնուացըել, որ, այսպէս ասած, բոլորովին յունացրել են այդ տարրերը: Վերցնենք, օրինակի համար, դիւցաբանութիւնը: Միևնույն բնական ոյժերն են, որ յոյներն էլ աստուածացրել են հնդկացիների նման, բայց որքան տարբերութիւն այդ երկու ազգերի պատկերացումների մէջ. արիացիք սիրում էին վիթխարի, մշուշապատ, նոյնիսկ այլանդակ կերպարանքներ, մինչդեռ յոյների աստուածները սովորական մարդկանցից զանազանում էին միայն նրանով, որ աւելի գեղեցիկ, ուժեղ ու կատարեալ էին. այդ աստուածներն ևս ունէին վիշտ և ուրախութիւն, թէև անմահ էին համարում. նրանց հետ մօտիկ յարաբերութեան մէջ մտնել կարող էին մարդիկ, որոնցից սերում էին հերոսներ և հետզհետէ աստուածանում:

Տեսնում ենք, որ պարզութեան վերածելը, շօշափելի, ըմբոնելի՝ կերպարանք տալը նրանց էական բնութագծերից է. այդ բանն արտայայտում է նաև գեղարուեստի մէջ, որի պլաստիկ կատարելութեանը դեռ ոչ մի ազգ չէ հասել:

Ապա ուշադրութեան արժանի է յոյների մշտական շարժուն կեանքը: Ելլադայում վազուցիվեր ծաղկած էր նաւարկութիւնը. բացի այս, մըցումներն ու խաղերը նոյնպէս կարկոր տեղ էին բռնում նրանց կեանքում. յոյնի իդէալն էր

ոլլմպիական խաղերի ժամանակ դափնի ստանալը. յիշենք վերջապէս սպարտական դաստիարակութեան սկզբունքները, և կստանանք, որ Փիվիքական ոյժն ու գեղեցկութիւնը, որ նրանք զարգացնում էին մարմնամարզութեան միջոցով, անդրադառնալու էին նաև արուեստի մէջ:

Դալով նրանց լեզուին, որ հնդկոպական ծագումն ունի, համապատասխանում էր նրանց իդէալին: Յոյներն ունէին չորս գլխաւոր բարբառ. Ա.) յօնական, որ չոմերոսի և չերոդոսի բարբառն է, և որի բառերն ունենալով շատ ձայնաւորներ՝ քաղցրահնչիւն են և ձկուն: Բ.) էօլական (կամ լեսալիական), որով գրուած են Ալկէի և Սաֆօյի ոտանաւորները. այս բարբառը շատ փոքր տեղ է բռնում գրականութեան մէջ: Գ.) դորիական, որ Պինդարի և առհասարակ խմբերգութեան լեզուն է՝ լուրջ և բաւական ծանրահնչիւն: Եւ Դ.) ատոմիկական, որ մօտիկ ազգակից է իօնականին. այդ լեզուով են գրուած յունական ողբերգութիւնները, Քսենոֆոնի և Պլատոնի երկերը, ինչպէս և Դեմոսթենի ձառերը: Բոլոր բարբառների գեղեցիկ յատկութիւններն ամփոփուած են ատամիկականի մէջ, որի բառերը սեղմ են կազմուածքով. այդ բարբառն էր, որ դարձաւ պետութեան լեզու, մինչև որ քաղաքական կեանքի հետ զուգընթաց աղաւազուեց հետզհետէ:

Որքան էլ սահմանափակենք այս բարբառ-

ներից իւրաքանչիւրի որակն ու շրջանը, այսուամենայնիւ նկատելու է, որ նրանցից ամեն մէկը յաճախ օգտուում էր միւսից, որոշ խառնուրդ կազմելու աղատութիւն վայելում: Մարդկութիւնն աւելի զարգացած լեզու չունի, քան հին յունարէնն է, որի շեշտագրութիւնը, ձայնաւորների և բաղաձայնների բարեխառնութիւնը, վերջապէս բանաստեղծութեան համար առանձին բառեր ու ոճեր ունենալին անմըցելի են դարձնում այդ լեզուն թէ արձակի և թէ չափածոյի տեսակէտից:

Ակզբում կրօն, ստանաւոր և երաժշտութիւնն միացած են եղել, ուստի ներդաշնակութեան պահանջը նոյնպէս որոշ չափով աղդել է, լեզուից զատ, նաև երկերի կազմութեան վրայ:

Սակայն այս բոլոր դիտողութիւնները, կարծես, գեղարուեստի արտաքինի հետ միայն կապ ունեն և թերևս ենթադրել տան, թէ յոյները գուցէ անխնամ էին վերաբերում իրենց ստեղծագործութեանց ներքին մասին. ուստի աւելացնենք, որ հելլենների գրականութիւնը միևնույն ժամանակ շատ իմաստալից է: Յոյները, որ հետաքրքրուող ժողովուրդ էին, ունէին առողջ աշխարհայեցք. նրանք մարդուն կապում էին երկրի հետ, նրանք սիրում էին կեանքը և միայն կեանքը. նոյն իսկ նրանց աստուածներն ապրում էին մեզ նման: Այս պատճառով էլ, առանց մշուշապատ միստիքականութեան, ուսում-

նասիրեցին իրերն ու երեսյթները, ինչպէս որ կային, ամեն ինչի պատճառն ու հետևանքը բացարել ձգտեցին մարդկօրէն, որով նրանց տեսութիւնները ճշտութեան, իրականութեան սահմաններից երբէք չը հեռանալով հանդերձ՝ աւելի մեծ վստահութիւն ներշնչեցին նրանց՝ դէպի սեփական ոյժերը: Յունական բոլոր ստեղծագործութիւնների մէջ թագաւորում է մի մեծ լաւատես հոգի, զգացւում է մի կայտառ բնաւորութիւն, որ վեհափառօրէն համարում է իրեն երկրի տէրը:

Կայ սակայն, մի այլ ուշագրաւ հանգամանք ևս, ուրիշ ազգերի մէջ գեղարուեստը սեփականութիւն է մասնաւոր, բացառիկ անհատների, աւելի նեղ շրջանի է մատչելի, մինչդեռ Ելադայի քնակիչներն ազգովին էին հետաքրքրուում գեղարուեստով. մեծ վարպետների կողքին գըտնում ենք նաև հազարաւոր համեստ աշխատաւորներ, որոնց շինած անօթներն ու չնչին իրերն արուեստի հրաշալիքներ են համարւում այսօր, առանց նոյնիսկ նկատի առնելու այդ առարկանների հնագիտական արժէքը: Եւ հէնց գեղարուեստին տածուած այդ ընդհանուր սիրոյ հետևանքն է, որ նրանք աստուածացը ել են արուեստի բոլոր ձիւղերը, կրօնական պաշտամունքի նիւթ դարձրել և իւրաքանչիւրին մի պաշտպան մուսայ նշանակելով՝ բազմեցրել Պանասի երկնային բարձունքներին:

Այսպիսով քիչ թէ շատ պարզելուց յետոյ այդ երկրի և ժողովրդի բնաւորութեան էական գծերը, անցնենք մեր ծրագրին, որ կընդգրկէ «Անկախ Յունաստանի զրականութիւն» կոչուող մասը, այսինքն՝ ծագումից մինչև IV դարի վերջը գրուած այն երկերը, որոնք գեղարուեստական են և ունին համաշխարհային մեծ նշանակութիւն:

Սկսենք նախահոմերեան շրջանից:

Միայն հատուկառ տեղեկութիւններ, ակնարկներ են հասել մեզ այդ սկզբնական շրջանի մասին, իսկ անհերքելի փաստաթղթեր, որոց տեղեկութիւններ՝ ոչ։ Բայց որ Իլիականից առաջ եղել են բազմաթիւ բանաստեղծներ ու կարեռ երկեր, դա անկասկած է, որովհետև անկարելի է նոյնիսկ ենթադրել, թէ ոչնչից, հէնց մի անգամից յոյները շարադրել են Իլիականի նման գլուխ-գործոց։ Դրանից առաջ լինելու էր անշուշտ պատրաստութիւնների և ստեղծագործութեանց մի երկար շրջան, որ իվերջոյ ծնուէր Հոմերոսի դիւցազներգութիւնը, որ նախընթաց վարպետների փորձառութեանց սքանչելի սինթեզն է։

Հին հեղինակների (Հոմերոս, Հեղիոդ, Հերոսոտ և այլն) ու աւանդութիւնների տուած տեղեկութիւնները մեզ ստիպում են մտածել, որ հիւսիսային Յունաստանի Պիէրիա գաւառից է բանաստեղծութիւնը տարածուել դէպի հարաւիէօթիա և Ատարիկէ։

Յայտնի է նոյնպէս, որ հնուց գոյութիւն մէն ունեցել մաղթանքներ, սգոյ (թրեն), ուրախութեան (պէան), ինչպէս և հարսանիքի երգեր։

Ցիշում են նոյնպէս մի քանի բանաստեղծներ (Որփէոս, Լինոս, Մուսայ, Եւմոլպ, Պամփոս), բայց նրանց պատմական ճշտութիւնը կասկածելի է. այդ անձնաւորութիւնները կարող են եղած լինել նաև կրօնական պետեր, որոնք ծէսերի ժամանակ երգում էին աղօթքները. կամ թէ այդ անունները հետագայում ստեղծուած երևակայական տիպարներ են, որոնք արդարացնելու էին ուշ ժամանակներում զրուած ոտանաւորների հնութիւնը։

Կարեռը է արձանագրել նոյնպէս Դելոս կղզում ծաղկող բանաստեղծութիւնը, որի հիմնադիրն է եղել լիկիացի Օլենը. իբր թէ նա միենոյն ժամանակ ստեղծել է հեքսամետրը։

Պիէրիայի երգերի գլխաւոր առարկան էր Արամազդը, որի աղջիկներն էին համարւում մուսանները. սրանք երգում էին իրենց հօր յատկութիւնները։ Մինչդեռ Դելոսի բանաստեղծութեան կենարոնական անձնաւորութիւնն էր Ապոլոն, որին պատկերացնում էին կիթառ նուագելիս և մուսաններին զեկավարող։

Ասացինք, թէ Օլենը լիկիացի էր, իսկ լիկիան գտնւում է Փոքր-Ասիայում. միւս կողմից տեսանք, որ Պիէրուս լերան լանջից էին դէպի հարաւ տարածուել հելլենների նախնական եր-

գերը։ Ահաւասիկ այս երկու հոսանքները, յուշական և արևելեան, ընդհարուել են իրար հետ Դելֆում. առաջինն աւելի պահպանողական էր, քան երկրորդը, որ Արևելքից նոր տարրեր էր բերում, ինչպիսիք են՝ կիթառի ներմուծութիւն, տաղաչափութեան գործածութիւն և այլն։ Շուտով Դելֆում կազմակերպուեցին երգիչների մրցումներ, որոնց մասնակցել են Քրեզոթեմիս, Ֆիլամոնն և Թամիրիս։ Այդ բանաստեղծները գովաբանում էին աստուածներին և հերոսներին՝ մի առ մի թուելով նրանց յատկանիշները, որոնք համապատասխանում էին ունկնդիրների կրօնական զգացմունքներին։ Հեզիոդի (VIII դար) «Աշխատանքներ և օրեր» գրուածքի սկզբում գրուած հետեւեալ կոչը թերեւ մօտաւոր գաղափար տայ յոյների նախնական մաղթանքների մասին։ «Պիէրիայի մուսաներ, ովք դուք երգի տատուածներ, որ փառք էք շնորհում, եկէք, մաղթանքներով փառաբանեցէք Զեսին՝ ձեր հօրը. Զեսին, որից ստեղծուել են բոլոր մահկանացուները՝ յայտնի թէ անյայտ, հոչակաւոր թէ անշուք, ըստ իւր երկնային կամքի։ Առանց դժուարութեան նաև տալիս է ոյժ. առանց դժուարութեան նաև խորտակում է ոյժը. առանց դժուարութեան նոյնպէս նաև խոնարհեցնում է նախանձելիներին, բարձրացնում անտեսներին Զեսին, որ նստած իւր գերագոյն բնակավայրում՝ թնդացնում է կայծակը օդի մէջ.....»։

ԴԻԻՑԱԶՆԵՐԳՈՒԹԻՒՆ

Յունական կեանքում XII և XI դարերում հանդէս են գալիս քաղաքական ծանրակշիռ ու ցնցող երկոյթներ՝ նոր հորիզոններ բանալով բանաստեղծութեան համար։ Այդ երկոյթներն էին դորիացոց հաստատուելը Պելոպոնեսում, աքայեցոց անկումը Միսենայում, էօլական և իօնական իշխանութեանց սկզբնաւորներինը Փոքր Ասիոյ ավերին, գաղթականութիւն, կոկւ ու արկածներ, որոնց շարքում կարևոր տեղ են բռնել աքայեցոց ու տրոյացոց ընդհարումները XI դարում։

Փոթորկալի անցքերի ժամանակ յառաջ գալով հերոսներ՝ բնականօրէն դառնում են նիւթերգերի. չէ՞ որ ցարդ եղած ոտանաւորների մէջ կային աստուածներ և կիսաստուածեան դիւցազներ, որոնք բոլորն էլ ունէին մարդկային գծեր. հետեւաբար նին ունոր նիւթերի մէջ եղած տարբերութիւնն այնքան էլ մեծ չէր, որ դժուարութեամբ կապուէին իրար հետ. իսկապէս հերոսներն էին այն օղակները, որոնք աշուղներին հետզհետէ գերբնականից իջեցրին գէպի մարդկայինը։

Յունաստանի իւրաքանչիւր քաղաքն ունէր

իւր ծագման պատմութիւնն ու նախահայր հեռոսը: Գաղթականներն իրենց հետ Փոքր Ասիա տարան այդ աւանդութիւնները, որոնց խառնուեցին նորանոր յիշողութիւններ և նիւթ դարձան արկածալի ու չափածոյ բազմաթիւ պատմուածքների: Այս խմբերից (ցիկլ) իւրաքանչիւրը բաղկացած էր մի հերոսի անուան հետ առնչութիւն ունեցող անկախ երգերից: Աշուղները ժամանակի ընթացքում միմեանց յարեցին այդ անկախ երգերն ու խմբերը և կազմեցին ազգային մի ընդհանուր արշաւանքի պատմութիւն, որ կարծես լինէր յոյն գաղթականութեան գործադրած ջանքերի գերագոյն պատկերը: Արշաւանքին մասնակցեցին հելեն քաղաքների և ցեղերի ներկայացուցիչները՝ ընդդէմ թշնամի տրոյացոց, ստեղծուեց յունական գիւցագներգութիւնը, որ յայտնի է իլիական անունով և ունի գրեթէ 16000 տող՝ բաժանուած 24 գլուխների, չափն է հեքսամետրը:

Իլիականի ամենահին և էական մասերն են Սքիլէսի քէնը, յոյների պարտութիւնները, Պատրոկլէսը և Հեկտորի մահը: Հաւանական է, որ Հոմերոս անունով երգիչը եղած լինի այդ կտորների հեղինակը. նա ապրած է լինելու IX դարում. նրա մայրը, որ կիմէացի էր, իւր հանճարեղ որդուն ծնեց Մելես գետի ափին՝ Զմիւնիայում. այս պատճառով էլ երախան կոչւում էր Մելեսիդեն, այսինքն՝ Մելեսածին, որին իբր

թէ աշուղութիւն է սովորեցրել ֆեմիոսը: Միքանի ժամանակից յետոյ բանաստեղծը զրկուելով տեսողութիւնից՝ ստացել է Հոմերոս անունը, որ յունարէն կը նշանակէ կոյր: Նա ճանապարհորդել է Էօլիայում, Յունաստանում և գաղութներում. ենթադրւում է, որ Քիոսում է յօրինել նա վերոյիշեալ հատուածները: Հոմերոսից յետոյ էլ դեռ երկար ժամանակ այդ կղզին շարունակել է մնալ բանաստեղծների բնակավայր. յառաջ են եկել հոմերիլիներ, որոնք իրենց համարում էին մեծ վարպետի յաջորդները և, առանց դուրս գալու նրա նախագծած սահմաններից, հետզհետէ ընդարձակել են մասերը, լրացրել բացերը և թափառելով հելենական բոլոր գաւառներում՝ ժողովրդականացրել իլիականը, մինչև որ VI դարում գրի առնուեց Պիսիստրատի պատուէրով:

Նախ քան այդ երկի քննութեանն անցնելը, անհրաժեշտ է դեռ համառօտակի պատմել բովանդակութիւնը.

Տրոյան Փոքր Ասիոյ ծովափնեայ քաղաքներից մէկն էր. աստուածներն էին շինել նրա պարիսպները. թագաւորի անունն էր Պրիամոս, որ ունէր 50 որդի. ամենաքաջը Հեկտորն էր, ամենագեղեցիկը՝ Պարիսը: Մի օր վերջինս հիւր է գալիս Սպարտայի Մենելաոս արքայի տունը և փախցնում նրա կնոջը՝ անսման Հեղինէին: Այս բանի վրայ հաւաքւում են Յունաստանի

իշխանները և Մենելաօսի եղբօր՝ Միսենայի թագաւոր Ազամեմնոնի հրամանատարութեան տակ ճամբայ ընկնում՝ վրէժ լուծելու տրոյացիներից։ Բանակը բաղկացած էր 1200 նաւից և 100,000 զինուորից։ Դեկավարների մէջ աչքի էին ընկնում խորամանկ Ողիսեսը, որ իտակէի արքան էր, և միրմիդոնների պետ Աքիլլէսը՝ քաջ ու ճարպիկ։

Բայց ուժեղ էր նոյնպէս թշնամին, որ սպառապետութեան դեկը յանձնել էր Հեկտորին։

Տասը տարի տեսեց կոփւը. նոյնիսկ աստուածներն երկու մասի բաժանուած՝ կուռմ էին զինուորների շարքերում։

Աքիլլէսին մի անգամ աւարից բաժին էր ընկել մի սիրուն աղջիկ, անունը Բրիդէիս. Ազամեմնոնը խլեց նրան. Աքիլլէսը սաստիկ վիրաւորուած՝ քաշուեց իւր վրանը՝ յայտարարելով, թէ այլ ևս չէ կոռւելու յոյների համար։ Այժմ տրոյացիք մեծ յաղթութիւններ էին տանում. նրանք պատրաստում էին մինչև իսկ հրդեհելու յունական նաւերը։ Այն ժամանակ Պատրուլիէսը վերցրեց իւր սիրելի ընկերոջ՝ Աքիլլէսի զէնքերն ու զրահը և գնաց, հալածեց թրշնամիներին, բայց շուտով ինքն էլ սպանուեց Հեկտորի ձեռքով։ Հէնց որ այս լուրը բերին Աքիլլէսին, նա կատաղած դուրս եկաւ նորից կը ուռի և Հեկտորին տապալելով՝ կապեց կառքի յետեց, քաշ տուեց պարիսպների շուրջը։ Թը-

շուառ Պրիամոսն եկաւ, խնդրեց որդու դին, որ ողբալով թաղեցին տրոյացիք։

Որչափ էլ կորովի ու գեղեցիկ լինի այս նիւթը, որ, հակառակ մի քանի գլուխների ձըգձըգուածութեանը, այնպէս ամփոփ է նաև, լրիւու պարզ, դեռ աւելի կը բարձրանայ մեր աշշում, եթէ քննենք գործողութեան ընթացքը, տիպարները, գաղափարները և այլն։

Արդ, հէնց առաջին երգից դրաման իւր ամբողջ ուժով կանգնած է մեր առջև. հէնց առաջին գլխից բոլորի Փիզիքական և բարոյական ուժերը լարուած են. 1200 նաւ, 100,000 զինուոր բանակ են դրել Տրոյայի հանդէպ։ Հեկտորն էլ պատրաստ է իւր քաջերով։ Կոռի պատճառն է գեղեցիկ Հեկինէն, որը մի քանի հարիւր քայլ հեռու Իլիոնում է. ուստի իւր մերձաւորութեամբ աւելի ևս մտրակում է երկու կողմերի պատուասիրութիւնը։

Այդ դեռ հերիք չէ. Ազամեմնոնը խլել է Աքիլլէսի սիրած աղջկան. Վիրաւորուած իշխանը գանգատում է իւր մայր Թետիսին. սա խնդրում է Զեսին վրէժխնդիր լինել, յոյներին պատժել. անմիջապէս աստուածները բաժանուում են երկու մասի և շահագրգուռուած իջնում երկիր, մասնակցում պատերազմին։ Կը նշանակէ կոռի սաստկութիւնն ու վախճանը կրկնակի են հետաքրքրում մեղ այժմ։ Աւելացնենք նոյնպէս, որ Աքիլլէսի քէնը նրան աւելի սերտ կերպով է

կապում կռուին, քանի որ նա հիմայ իւր կաշուի վրայ էր փորձում Մենելաօսի դժբաղդութիւնը, հետեաբար՝ ատելով Ազամեմնոնին՝ նա աւելի ևս ատելու էր Պարիսին, որ նոյնպէս խըլել էր ուրիշի հարար:

Այնուհետև յաջորդող գլուխների մէջ նկարուած է կռիւր. բայց թէ ով է յաղթելու, չը գիտենք դեռ: Եթէ առաջին գլխի մէջ հեղինակը վարպետօրէն ծանօթացրեց մեզ իւր նիւթի էռւթեան, այսաեղ էլ աննման տաղանդով կը պատկերացնէ հին պատերազմների և մարդկանց վայրագութիւնը, նրանց զէնքերը, ոյժը: Այդ կտորների մէջ չոմերոս մի վիթխարի նկարիչ է, որ մի գծով, մի գոյնով գիտէ կենդանացնել իրերը:

Աքիլէսը, չեկտորը և իլիոնը կռուի երեք սիւներն են. այս պատճառով էլ երկրորդի մահն այնքան խոր տպաւորութիւն է թողնում մեր վրայ. մենք կարծես տեսնում ենք նաև Տրոյայի մօտալուս անկումը: Բայց չը կարծենք, թէ յոյները շատ երջանիկ են. ընդհակառակն, նրանք էլ մեծ զոհեր են տուել, միայն թէ վրկուած է ազգային պատիւը: Ինչպէս յաղթութեանց, այնպէս էլ կորստների այս գրեթէ հաւասարակշիռնաւորութիւնն ունի այն արժէքը, որ կռիւն ստանում է լրջութիւն, բացազլուում հերոսների փոխադարձ արժանիքը և անխուսափելի դարձնում, պատերազմի աղէտաբեր հետեւանքը. այլապէս ոչ յոյների գայրոյթի աստիճանը կըզգա-

յինք, ոչ Պրիամոսի պարսպների ամրութիւնը, ոչ էլ չեղինէի գեղեցկութիւնն ու յանցանքն իրենց ամբողջ մեծութեամբ:

Մինչև XV երգը չեկտորն է հերոս, այնուհետև Աքիլէսը, բայց վերջում թէ մէկը և թէ միւսը դժբաղդ են. այս էլ ձեզ պատերազմի վիլսոփայութիւնը. յաղթողը նոյնքան թշուառ է, որքան և յաղթուողը:

Գլուզ տիպերին՝ նրանց թիւը շատ մեծ է. ծեր, երիտասարդ, երեխայ, կին, աղջիկ, հարուստ, աղքատ, քաջ, վատթար, բարի, չար, իմաստուն, յիմար, գեղեցիկ, տգեղ, ամեն տեսակ մարդիկ կը գտնէք իլիականի մէջ: Վերցնենք գլխաւորներին:

Առաջին տեղը պատկանում է Աքիլէսին, որ վիպերգի հերոսն է, քանի որ նրա քէնն է զբաղեցնում աստուածներին ու մարդկանց. նա է, որ սպանելով չեկտորին՝ սպի մէջ է ընկղմում ամբողջ Տրոյան. իսկապէս առանց Աքիլէսի՝ իլիականը կը զրկուէր կենտրոնական դէմքից: Նա քաջ է, կրքոտ, ինքնասէր և մեծ կամքի տէր. բայց այդպիսի յոյներ շատ կային բանակում, միայն թէ ոչ մէկը թետիսի որդի չէ, որովհետեւ սրա քաջութիւնն էլ, կիրքն էլ, ինքնասիրութիւնն էլ ինչոր անբացազրելի վսեմութիւն, աստուածային փայլ ունեն, որը բոլորին ստիպում է սիրել նրան, պատկառել նրանից: Ուստի երբ նա մեկուսանում է կռուից, բոլորն էլ վհատ-

ւում են. իսկ երբ յայտնուում է, վիրաւորուածներն անգամ ոգի են առնում: Սակայն Աքիլէսը նաև ընկերասէր էր խորապէս. եթէ Պատրոկլէսը չընկնէր, գուցէ նա երբէք էլ կրկին չը մտնէր պատերազմի ժխորը. ընկերոջ սէրն էր, որ մոռացնել տուեց նրա անձնական վիրաւուրանքը, և հաշտութեան ձեռք մեկնելով իւր թլշնամի Ադամեմիոնին՝ նա գնաց վրէժ առնելու տրոյացիներից: Այսպիսով ընկերսիրութեան այդ գիծը նրան աղնուացնում է: Սակայն աւելին կայ դեռ. Աքիլէսը որչափ էլ որ ատելութեամբ լցուած է դէպի Հեկտորը, այնուամենայնիւ, երբ տեսնում է վերջնիս հօրը՝ ծերունի Պրիամոսին, որ, արցունքն աչքին, խնդրում էր նրանից իւր որդու դին, նրա զայրոյթը մեղմանում է: Նու կարեեցում է արքայի ճակատագրին և զգում մարդկային կեանքի ամենասուրբ թշուառութիւնները. հրամայում է լուալ Հեկտորի մարմինը, իւղով օծել և այնպէս յանձնել Պրիամոսին. այդ վայրկենին Աքիլէսն անմրցելի վեհութիւն ունի: Վերջապէս դիտեցէք, որ նա, գեղեցիկ ու թեթեաքայլ, գիտէր նաև քնարնուագել. մի մոռանաք, որ նա պատրաստ էր աւելի շուտ մեռնել երիտասարդ հասակում, բայց փառքով, քան թէ խաղաղ ու երկար ապրել անփառնակ: Իրօք, յոյների դիւցազնական շընանի իդէալական տիպարն է Աքիլէսը, որի հերոսական գծերն որչափ էլ որ մօտենաւմ են աս-

տուածայնութեան, սակայն և այնպէս խորապէս մարդկային են, որովհետեւ նա էլ է տանջլում, նա էլ է մեռնում իվերջոյ:

Եթէ Աքիլէսը յոյների հերոսն էր, Հեկտորն էլ՝ տրոյացոց դիւցազնը: Սակայն որպէսզի նրանց պատկերները տարբերուին իրարուց, որպէսզի Աքիլէսից յետոյ նա ևս մնայ հետաքրքիր, Հոմերոսը զանազանում է նրանց դրութիւնները: Հեկտորն ինքնուրոյն կերպարանք ունի և նոյնքան վսեմ է, որքան իւր ախոյեանը: Վերջնիս տունն. ու ընտանիքը հեռու են, մինչդեռ Իլիոնի սպարապետի աչքի առջև են կին, փոքր որդի, ծերունի հայր ու սիրառատ մայր. սրանք բոլորն էլ կոռուի ամբողջ ընթացքում ներկայ են. ուստի և ահարկու թշնամին ստիպելու էր Հեկտորին մտածել, որ իւր մահից յետոյ Անդրումաքէն գերի կընկնէր, զաւակը կորբանար, ծնողներն ու նախնեաց գերեզմաններն էլ կայրուէին: Այս բոլորը նրա հոգեբանութեան վրայ սաստիկ ազդում էին: Մահը նրա համար շատ աւելի ծանր էր, քան հէնց Աքիլէսի համար, բայց և այնպէս. Տրոյայի հերոսը մխիթարում էր, սիրտ տալիս իւր կնոջն ու ծնողներին և դիմում ուազմի դաշտը. ուրեմն նրա պատուասիրութիւնն ու սրբազն զգացմունքներն աւելի դժուար պայմանների մէջ էին դրուած. այս պատճառով էլ Հեկտորի անձնաւորութիւնը մի խոր համակրանք է ներշնչում մեզ: Նա իւր վրայ էր առել պա-

աերազմի ամենապատասխանատու դերը, թէև
ինքը ոչ մի յանցանք կամ ցանկութիւն չունէր.
յանցաւորներն իւր եղբայրն ու Հեղինէն էին. իսկ
ինքը եթէ կուռում էր, պատճառն այն էր, որ
թշնամին ստիպում էր նրան պաշտպանել հայ-
րենիքը: Բացի այս, այնքան վեհանձն է նա, որ
ոչ միայն բնաւ չէ մտածում առևանգուած հար-
սին յանձնելով յոյներին՝ վերջ դնել կոռուին, ա-
զատել քաքաքը պաշարումից, այլ նաև երբէք
մի կոշտ խօսք անգամ չէ ասել Հեղինէին իւր
կեանքում: Հեկտորը նոյնիսկ բարեկամութեան
ձեռք է մեկնում թշնամի Այաքսին, երբ մի ան-
գամ երկար ոգորելուց յետոյ՝ ստիպում են
բաժանուել մթութեան պատճառով. «Թշնամու-
թիւնը մօտեցրեց մեզ մենամարտելու, թող այժմ
բարեկամութիւնը մեզ բաժանէ», ասում է նա
Այաքսին և սիրով անջատում. դա չէ նշանա-
կում, որ նա վախենում է, շողոքորթում, ոչ,
այլ որ նա իսկապէս ասպետի հոգի ունի. երբ
առիթը ներկայանայ, կը կին կը մրցի անվախ
կերպով:

Ինչ վերաբերում է Հեղինէին, այնքան գե-
ղեցիկ է նա, որ իլիոնում բոլորն էլ ներում են
նրա յանցանքը. աւելի հրաշալի կերպով անկա-
ռելի է նկարել նրա դիմանկարը. և քանի որ
աստուածների նախամտածած ծրագրովն էր Պա-
րիսը փախցրել այդ կնոջ, ուստի նրա խոշոր
մեղքը գեռ աւելի էր մեղմանում կարծես: Այդ

աննման կինը սակայն դժբաղդ է. նա զգում է,
որ առիթ է տուել արինոտ կոռուի, խղճի խայ-
թը տանջում է նրան: Պարսպների վրայից դի-
տելով իւր նախկին ամուսնու և ծանօթների
կերպարանքները՝ որքան հոգեկան տանջանքներ
պէտք է կրէր նա. ի՞նչ վիճակ էր սպասում ի-
րեն, եթէ յանկարծ ընկնէր հելենների ձեռքը.

Սքանչելի է նոյնպէս Հեկտորի կինը՝ Անդ-
րումաքէն, որ ամբողջովին զգացմունք է. իբր
սիրառատ կողակից, նա գողզոջում է ամուսնու
մօտալուտ վախճանի բնազգական սարսափով:

Մի կատարեալ ամբողջութիւն է նաև ծե-
րունի Պրիամոսը մանաւանդ այն ըոպէին, երբ
Աքիլլէսից խնդրում է իւր որդու դիակը:

Նեստոր անունն անգամ զարթեցնում է մեր
մէջ փորձառութեան մարմնացումը:

Այսքան մեծ հերոսներից յետոյ, որոնց շար-
քը գեռ կարելի է երկարեցնել անվերջ, տես-
նենք, թէ ինչպէս է չոմերոսը պատկերացնում
Թերափէսին. «Նա շատախօս էր չափազանց և
մեծերի ու արքաների նկատմամբ քսու, հայոյող,
միայն թէ կարողանար ուշագրութիւն գրաւել,
ծիծաղեցնել յոյներին: Իլիոն եկած մարտիկնե-
րից ամենատգեղն էր նա՝ աչքերը շիւ, ինքը
կաղ. ուսերը կոր էին, կուրծքը՝ փոս ընկած.
գլուխը սրածայր էր, հազիւ մի քանի ցիր ու
ցան մազեր ունէր....»: Համարձակում էր նկա-
տողութիւններ անել Ողիսեսի ու Ագամեմնոնի

նման անձնաւորութեանց. բայց երբ նրա յանդընութիւնն հասաւ այստեղ, որ ծաղրեց Աքիլէսին, վերջինս բռունցքի հարուածով սպանեց նրան:

Դժբաղդաբար մեզ հասած իլիականն ազատ չէ թերութիւններից, որոնք բղինել են այն հիմնական պատճառից, թէ բազմաթիւ աշուղներ, իրարից անկախ, աշխատել են նրա վրայ: Այստեղից էլ ծագել են աւելորդ միջնավէպեր կամ թէ մացել պակասաւոր մասեր: Օրինակի համար՝ Պատրոկլէսի, Դոլոնի, Դիոմեդի և Այաքսի մասին եղած հատուածներից շատերը բաւական արհեստական կերպով են միացած բուն նիւթին. իսկ Ազամեմնոնի նախնական գոռող դէմքն աղաւաղուած է շատ տեղ: Բացի այս, Իլիականի վախճանը կիսատ է, քանի որ վերջանում է Հեկտորի մահով. կռուի հետևանքի մասին ոչինչ չէ ասուած. ստիպուած ենք կարդալ Ողիսականը և ուրիշ աղբիւրներ՝ իմանալու թէ այրուեց քաղաքը, թշնամին տարաւ իլիոնի գանձերն ու կանանց: Այս լրացուցիչ տեղեկութիւնները միացած էին լինելու իլիականին, քանի որ նրա մասն են կազմում էապէս:

Յոյներն ունին դիւցազներգական մի ուրիշ զլուխ-գործոց ևս, որ կոչում է Ողիսական՝ բաժանուած 24 զլուխների. բայց ինչպէս այդ,

այնպէս էլ իլիականի բաժանումը կատարուել է II դարում Քրիստոսից առաջ և հիմնուած է յունական այբուբենի պարունակած տառերի թուի վրայ, նպատակ է ունեցել միայն գործնական յարմարութիւնը և ոչ թէ որևէ է գիտական տեսակէտ:

Ողիսականի հեղինակը Հոմերոսը չէ, այլ մի ուրիշը, որ ազդուելով իլիականից՝ շարադրել է IX և XI զլուխները, ուր Ողիսական Ալկինոէ արքային պատմում է իւր գլխին եկած արկածները՝ Տրոյայից մեկնելուց յետոյ: Այդ հիմնական և հանճարեղ հատուածներին հետզհետէ, այլևայլ աշուղների ձեռքով, միացել են միւս զլուխները, որոնք նախորդող և յաջորդող դէպքերը նկարագրելով՝ կազմեցին մի որոշ ամբողջութիւն առաջնների հետ միասին, հաւանականաբար VIII դարում:

Եթէ համեմատենք իլիականն այս վիպերգի հետ, կը տեսնենք, որ եթէ առաջինն աւելի վսեմ ու կորովի ծրագրով է յօրինուած, Ողիսականն էլ դրա փոխարէն աւելի նուրբ մտքի արտադրութիւն է: Երկրորդ՝ եթէ իլիականի մէջ կոիներ է նկարագրել հեղինակը, այստեղ էլ Յունաստանի խաղաղ ժամանակի կեանքն է ցուցադրուած: Երրորդ՝ Հոմերոսի հերոսը՝ Աքիլէսը քաջ ու կրքու է, մինչդեռ պատուհանների դէմ մաքառող Ողիսական աւելի խորամանկ, փորձառու, սառնարիւն և տոկուն է, նա գիտէ վտանգ-

Ներից ազատուել ճարպիկօրէն։Այս վերջին գիծը կազմում է հելլենների բնաւորութեան երկրորդ յատկանիշը։ Իետևաբար Աքիլլէս ու Ողիսևս միամին ամփոփում են յոյնի լրիւ տիպարը։ Վերջապէս Իլիականը հերոսական երկ է, այն ինչ Ողիսականն աւելի քաղաքակրթութիւնը դիտող մարդու գործ է։ Երկրից երկիր թափառել, տեսնել օտար ազգերի նիստ ու կացը, և իվերջոյ հազարաւոր վտանգներ յաղթելուց յետոյ՝ հասնել իւր հաւատարիմ կնոջ մօտ, խաղաղ յարկի տակ վայելել կեանքի բարիքները։ ահաւասիկ Ողիսականի փիլիսոփայութիւնը։

Իսկապէս այդ երկու երկերը միասին ընդգրկում են հին Յունաստանի քաղաքական և բարոյական կեանքի բոլոր երևոյթները՝ սկըսած կրօնից, աստուածներից, տարերքի և բնութեան մասին ունեցած հայեացքներից, անցնելով կոռուի արիւնոտ շրջաններից մինչև խաղաղութեան վայելքները։

Յունական դիւցազներգութեան հետ կապուած են նաև «Հոմերոսեան մաղթանքներ» և «Յիլեան բանաստեղծութիւններ» վերնագրուող հաւաքածոները, որոնցից առաջիններն աստուածներին ուղղուած կոչերից են բաղկացած, իսկ երկրորդի նիւթն է հերոսական այլեայլ արկածներ։ Այդ ոտանաւորների ուսումնառիրութիւնը

մեծապէս նպաստում է Իլիականի, Ողիսականի և առհասարակ ամբողջ շրջանի պարզաբանութեան։

Յիշատակելու է նաև Հեղիոդին, որի գրուածքների («Աշխատանքներ և օրեր», «Աստուածածնութիւն», «Յուցակներ», VIII-րդ դար) նպատակը ոչ թէ անցեալից քաղուած պատկերներով ունկնդիրներին հիացնելն է, ինչպէս Հոմերոսն էր անում, այլ նա հետաքրքիր տեղեկութիւններով կրթում էր հայրենակիցներին։ Նա տալիս է բարոյական խրատներ և զանազան գիտելիքներ դաշտային աշխատանքների, նաւարկութեան, աստղագիտութեան և աստուածների ու հերոսների ծննդաբանութեան մասին։

Այդ բոլոր երկերն էպիքական շրջանին են պատկանում։ Բայց արդէն հելլենական հանճարն արտադրել էր իւր դիցազներգական գլուխ-գործոցները։ այժմ պէտք էր փնտրել բանաստեղծութեան նոր ճիւղեր, ինչպիսին է, օրինակի համար, քնարերգութիւնը։



ՔՆԱՐԵՐԴՈՒԹԻՒՆ

Յունական գրականութեան նախնական շըրջանում արդէն գոյութիւն ունէին քնարական տարրեր՝ աստուծների ու հերոսների մասին եղած նիւթերի հետ խառն։ Ժողովրդական ստեղծագործութեանց այդ բեկորները պարունակում էին ապագայ գրականութեան բոլոր ճիւղերի սաղմերը, որոնք, քաղաքական որոշ պայմաններում, գիւցազներգութեան համար հիմք դառնալուց յետոյ, ծնունդ էին տալու նաև քնարերգութեան։

VIII. VII ու VI դարերի յունական պատմութիւնը լի էր կոփէներով ու գաղթերով. քաղաքական ցնցումները տակնուվրայ էին անում երկիրը. արքայական հին ընտանիքների տեղ գլուխ էին բարձրացրել բռնաւորներ, սկիզբ էր առնում գեմոկրատիան, անհատների ու դասակարգերի իրաւունքի հարցն էր մէջտեղ գալիս, Սոլոն գրում էր իւր օրէնքները։

Միւս կողմից, տաճարների շուրջը, կրօնական թէ ազգային տօների առթիւ, այս ու այն քաղաքը կամ տիրանը կազմակերպում էր մըրցումներ, որոնք զարկ էին տալիս նոյնպէս երգիչների անձնականութեան զարգացման, քանի

որ մասնակցող աշուղներն աշխատում էին յաղթանակել, փառքի դափնի ստանալ, ուշադրութիւն գրաւել։ Այստեղից էլ նոր ոյժ է ստանում քնարերգութիւնը, որին նիւթ է մատակարարում երբեմն ոլիմպիական խաղի հերոսը, երբեմն այսինչ արքունիքի կեանքը, ուր ապրում էր նաև ինքը բանաստեղծը, ուրիշ անգամ սէրը, ատելութիւնը կամ զայրոյթը. մի խօսքով՝ բացւում է ասպարէզ անհատական զգացմունքների ու դաղափարների զեղումի համար։

Քնարերգութիւն բառը ցոյց է աալիս, որ այդ շարքի ոտանաւորներից անբաժան է եղել քնարի կամ, աւելի ճիշտ, կիթառի ձայնակցութիւնը. մարդիկ չէին շարադրում կարդալու համար, ինչպէս այժմ է լինում, այլ որպէսզի աշուղը կամ խումբը երգէր, միևնույն ժամանակ պարը կատարում էր ներդաշնակ պայտաներ, իսկ կիթառը թէ սրինգը հնչեցնում ընթացակցող եղանակը. ուրիշ կերպ ասած՝ հելլենական քընարերգութեան միացած էին երգը, նուագն ու պարը։

Ճիշտ է, հոմերոսեան աշուղները նոյնպէս երգում էին ու նուագում, բայց նրանց երաժշտութիւնը միակերպ էր ու երկրորդական. հերոսական արկածներն էին այստեղ էականը. մինչդեռ քնարերգութեան մէջ ձայնի ու գործիքի մասնակցութիւնը գլխաւոր նշանակութիւն ունէր և շատ աւելի նուրբ արուեստ էր պահան-

ջում բանաստեղծից, որի զգացմունքների բազմերանգութիւնը նրան թելադրում էր ոճի ու չափի այլազանութիւն։

Իսկապէս քնարական իւրաքանչիւր տեսակ (Էլէգիա, եամբ, երգ ու խմբերգ) ունէր առանձին, տաղաչափութիւն, յաճախ սեփական նուագարան, յատուկ ոճ ու տարբեր բարբառ։ Եթէ դիւցազներգութեան բանաստեղծի անձնաւորութիւնը ջնջւում էր նաև հեքսամետրի, պատմելու ձեի ու լեզուի միօրինակութեան մէջ, քընարերգութեան աշուղն, ընդհակառակն, սկզբից իսկ ցուցադրելով իւր զգացածը՝ ազատագրում է նոյնպէս ոտանաւորի արուեստը։ Թէոդնիս, Արքիլոք, Սաֆօ, Անակըէոն և Պինդար բնաւ չեն ձնշել իրար, մինչդեռ բոլոր հոմերիդները ջերմեռանդ պատկառանքով հետեւել են իրենց վարպետին։

Ըստ իս, քնարերգութեան հէնց անհատական բնաւորութիւնն է, որ պատճառ է դարձել հազարաւոր երգերի կորստեան։ գրական ոչ մի ձիւղ ժամանակի ընթացքում այդքան կորուստներ չեն տուել։ Ոտանաւորների անկախութիւնն ու ծաւալի փոքրութիւնը միանալով անձնականութեան՝ պատճառ են դարձել, որ այդ գողորիկ ներշնչումները, մանր աղամանդների պէս ցիր ու ցան են եղել դարերի աւերակների տակ, հէնց որ հեղինակը մեռնելով՝ բաղդի քմահաճոյքին է թողել իւր բանաստեղծութիւնները։ Նոյ-

նը չէ կարելի ասել վիպերգի կամ ողբերգութեան մասին, որովհետև թէ մէկի և թէ միւսի մէջ արտայայտում էին ամքողջ ժողովրդի իդէալները, ուստի և արտազրուելով կամ անզիր՝ տարածում էին ամեն կողմ, յատուկ ինամքի արժանանում, մանաւանդ որ կրօնն էլիւր կողմից նպաստում էր այդ երկերի տեսականութեան։

Աւանդութիւնն ասում է, որ յունական երաժշտութեան և քնարական ոտանաւորների հիմնագիրներն են եղել Ոլիմպոս, Տերպանդը և Կլոնաս, որոնց գործը հետզիետէ շարունակեցին ուրիշները՝ աւելի ու աւելի լայնացնելով նախնական շրջանակը. այսպէս՝ եթէ սկզբում գործածում էր միայն կիթառ, յետոյ հանդէս են գալիս ուրիշ և աւելի կատարեալ գործիքներ։ Եթէ սկզբում գոյութիւն ունէին միայն «Նոմիս» կոչուած ծիսական երգերը, հետագայում զարգանում են բազմաթիւ այլեայլ տեսակներ։ Քննենք այդ տեսակներից իւրաքանչիւրը՝ ընտրելով՝ ականաւոր ներկայացուցիչներին միայն։

ԷլէգիԱ. Թէ՛ՌՆԻՄ (ՎI դ. երկ. կեսը)

Առաջին տեղը, ժամանակագրութեան կարգով, պատկանում է Էլէգիային, որ այսօր պարզապէս նշանակում է եղերերգութիւն, մինչդեռ հնում աւելի բազմաբովանդակ իմաստ ունէր

այդ բառը՝ Ելէգիան, սրնդի՝ ձայնակցութեամբ, մերթ երգում էր սգոյ տաղեր, մերթ յորդոր կարդում ժողովրդին, որ կռուի գնայ, ուրիշ անգամ խաղաղութիւն էր քարոզում կամ բարոյական խրատներ տալիս: Կարելի է ասել, որ Յունաստանում այդ տեսակը կատարում էր ճարտասանութեան պաշտօն՝ ձգտելով բարեկարգել գործնական կեանքը մանաւանդ:

Ելէգիան ունէր սեփական տաղաչափութիւն, որ էր երկտողանին՝ բաղկացած մի հեքսամետրից և մի պենտամետրից, այսինքն՝ առաջին ուղին ունէր տասներկու վանկ, իսկ երկրորդը՝ տասը, որոնցից իւրաքանչիւրը բաժանւում էր երկու հատածի:

Ելէգիա զրոյներից նշանաւոր են եղել Տիրտէ, Սողոն և մանաւանդ Թէոգնիս:

Վերջինս ապրել է VI դարի երկրորդ կեսում. նրա հայրենիքն էր Կորնթոսի Մեգար քաղաքը, որ այդ ժամանակ ասպարէզ էր ազնուականների ու ռամիկների արիւնոտ պայքարներին: Ինքը Թէոգնիս պատկանում էր այս կուսակցութիւններից առաջնին, որը նրա կարծիքով «ըարի» էր, իսկ ռամիկներին նա կոչում էր «չար»:

Բանաստեղծը զրկուելով իւր հարստութիւնից վրէժի թոյնը կրծքում, հեռացաւ հայրենիքից, սակայն երբ շուտով արիստոկրատիան յաղթող հանդիսացաւ կրկին, նա վերադարձաւ

Մեգար, որտեղ նրան սպասում էին նորանոր դժբաղդութիւններ. իւր սիրած աղջկայ ծնողները մերժեցին նրա առաջարկը, ասելով՝ թէ հասարակ ծագումով հարուստ մարդ է պէտք իւրենց և ոչ թէ աղքատ ազնուական:

Թէոգնիսի Ելէգիաները, որոնք հայելու պէս անդրադարձնում են հեղինակի կեանքն ու Մըջապատի դէպքերը, նուիրուած են Պոլիպոսի որդուն, անունը Կիրնոս, որը մի ազնուական երիտասարդ էր: Բանաստեղծը, իւր աւելի հասակաւոր ու փորձառու, դաստիարակում էր նրան՝ աչքից անցկացնելով կեանքի բոլոր երևոյթները, որոնք այս կամ այն չափով կապ ունեին իւր սանի հետ. այնպէս որ, եթէ Թէոգնիսի բոլոր երկերը հասած լինէին մեր ձեռքը, լրիւ գաղափար կը կազմէինք նրա աշխարհայեացքի մասին, որ կընդդրկէր աստուածների, ընտանիքի, հասարակութեան և կեանքի վերաբերեալ նրա կարծիքները: Դժբաղդաբար, ժամանակի կործանումից ազատուել են մօտտորապէս հազար տող միայն, որոնք սակայն բաւական ձգրիտ գաղափար են տալիս հեղինակի տաղանդի մասին:

Նրա ոտանանաւորների մէջ նախ և առաջ տիրապետում է մի յոռեան հոգի, որը սակայն անյոյս չէ. նա ևս Խայեամի նման ունայնութիւն է տեսնում մարդկային կեանքի մէջ, ներկայից օգտուելու խորհուրդներ տալիս, բայց այդ հոգին էապէս կասկածոտ է միայն, ոչ թէ բացասոդ.

«Ո՞վ պատկառելի Զես, դու լցնում ես ինձ զարմանքով. դու արքան ես աշխարհի, փառքով ու զօրութեամբ հարուստ. դու որ հրաշալիօրէն ճանաշում ես իւրաքանչիւրի սիրտն ու հոգին, քո իշխանութիւնը, ով թագաւոր, գերագոյն է. ի՞նչպէս ուրեմն, ով Քրոնոսի որդի, համաձայնում ես միենոյն շարքում դասելու չարերին ու բարիներին. նրանց, որոնք հոգով դարձած են դէպի արդարութիւնը, և նրանց, որոնք, հետեւով անհրաւութեան, դիմում են բռնութիւնների, բայց և այնպէս վերջիններիս բաղդը հաստատուն է, մինչդեռ բարիները՝ արդարութեան բարեկամները, որոնք բարձր են պահել իրենց սիրտը և խուսափել չարիքից, ընկնում են աղքատութեան մէջ, որ մայրն է տանջանքների»:

Նրա կարծիքով, փողը փչացնում է աշխարհը, և եթէ ժամանակակից ազնուականներն արդէն կորցրել էին իրենց արեան անխառնութիւնը, պատճառն այն էր, որ նրանք հարստութիւնից շացած՝ ամուսնանում էին ուամիկների հետ և հետզհետէ այլասեռում, բայց և այնպէս սոսկալի է չքաւորութիւնը. «Աղքատութիւնից խուսափելու համար, մի վախենայ նետուելուց խոր ծովը կամ անդունդը...» Իհարկէ, Թէոգնիսի կենսագրութիւնն իմանալուց յետոյ՝ ոչինչ զարմանալի չը կայ այս տողերի մէջ, որոնց գլխաւոր աղբիւրներն էին նրա կրած նիւթական ու բարոյական զրկանքները: Յուսահատութեան

այդ ճիշերը սակայն չեն կարողացել ստրկացնել նրան, որ երբ մտաբերում է, թէ իւր թշուառութեան պատճառը զարգացող գեմոկրատիան է, վրէժի մտրակը ձեռքին, բացականչում է. «Կրունկովդ խփիր ուամկին, որ յիմար է. ծակիր նրան քո խթանի սուր ծայրովը. ծանր լուծ դիր նրա վզին, որովհետև արեկ տակ և ոչ մի տեղ չես գտնի դու ստրկութիւն սիրող մի այդպիսի գասակարգ...»

Իվերջոյ աւելացնենք, որ Թէոգնիսի մշակած ոտանաւորների գործնական բնաւորութիւնը երբէք արգելք չէ հանդիսացել, որ նա իւր առնական ու անպաճոյճ ոճով հիւսէ քնարական սքանչելիքներ, որոնցից հետեւալը յատկապէս հետաքրքիր է. այդ էլէգիսով բանաստեղծն ակնարկում է, թէ իւր երկերն անմահացրել են կիրնոսին.

«Քեզ տուել եմ կեանքի թեր, որ սաւառնես թէ անսահման ծովի վրայ և թէ ամբողջ աշխարհում՝ թեթիօրէն բարձրացած: Տօների ու խնձոյքների ժամանակ ներկայ կը լինես՝ թոշելով միշտ մարդկանց շրթունքներին. ու սրնդի ձայնակցութեամբ, ախորժելի կոչունքներում, քեզ պիտի երգեն պատանիներն իրենց անոյշ ձայներով...»

ԵԱՄԲ. ԱՐՔԻԼՈՒ (VII դ. առ. կէսը)

Եամբային ոտանաւորը կազմւում էր կարճ
3

ու երկար վանկերի յաջորդական բաղադրութիւնից և արտայայտում հեգնանք, ատելութիւն ու զայրոյթ, հետեւաբար նման էր սատիրայի, և, եթէ չը լինէր յատուկ տաղաչափութիւնը, կարելի էր շփոթել էլէզէայի հետ:

Եամբն սկիզբ է առել Իօնիայում ու գործածուել զրեթէ միայն այնտեղ՝ առողանուելով երաժշտութեան ընթացակցութեամբ:

Բանաստեղծութեան այդ տեսակի ներկայացուցիչներից ամենայայտնին է Արքիլոքը, որ սերել էր նշանաւոր ընտանիքից, թէև մայրը ստրկուեի էր: Նրա հայրենիքն էր Պարսս կղզին, թուականը՝ VII դարի առաջին կէսը:

Արքիլոքի կեանքը չարաբաստիկ է անցել, ուստի մի տեսակ դանութեան շեշտ ունին նրա ոտանաւորները: Բաղդը փորձելու համար, նա դարձել է վարձկան զինուոր՝ առանց սակայն կոչում զգալու. յետոյ հաստատուել է թասոս կղզում, բայց այնտեղ էլ անյաջող են գնացել գործերը. այդ շրջանին է պատկանում հետեւալ հատուածը, որ ցայտուն կերպով պատկերացնում է և ապառաժոտ կղզին, և հեղինակի հիասթափութիւնը. «Կարծես բոլոր ձախորդութիւնները ժամանակիր են եղել այս կղզում, որ էշի մէջքի նըման ցցուած է վեր՝ վայրենի անտառներով պըսակուած»: Պատմում են, որ երբ Լիկամբէս անունով մէկը մերժեց նրան իւր աղջկայ ձեռքը, վիրաւորուած բանաստեղծը շարադրեց այնպիսի

թունաւոր տողեր, որ բարոյապէս սպանեց թէսիրածին և թէ հօրը:

Բայց նա ընդունակ էր նաև ազնիւ զգացմունքների. փեսայի մահուան առթիւ գեղեցիկ երգերով լացել է իւր զգացած վիշտը:

Հին հեղինակների վկայութեամբ, Արքիլոքի ոտանաւորներն արժանի էին դասուելու իլիականի կողքին. տարաբաղդաբար մեզ հասել են կտորներ միայն, որոնք սակայն հաստատում են նրա վայելած հոչակը. կարդանք, օրինակի համար, փիլիսոփայական տոկունութիւն քարոզող այս բեկորը. «Հոգիս, ով հոգիս, դու որ մի տըխուրը խաղալիք ես անթիւ վշտերի, ճակատ առ ճակատ դիմադրիր չարին և քո թշնամեաց թակարդների մէջ մնա անյողողողի: Երբ յաղթանակես, մի հպարտանայ պէտքից աւելի. իսկ երբ պարտուած ես, մի ընկճուիր դու հառաչանքներով. երջանկութեան մէջ ուրախութիւնդ չափաւոք լինի, իսկ բարկութիւնդ՝ թշուառ օրերիդ: Մի մոռանայ, որ մարդկային կեանքն անհաստատ է միշտ»:

ԵՐԳ. ՍԱՖՕ (VI դ. սկզբ.)

Քնարական բանաստեղծութեան երրորդ տեսակն է երգը, կամ, ինչպէս ընդունուած է ասել, թեթև ներբողը, որ էլէզիայի ու եամբի գործնական հոգսերից ազատ, ծաւալում է հեղինակի զգացմունքները. երգն է իսկական քնա-

բերգութիւնը, որին գլխաւորապէս նիւթ են տուել սէրն ու գինին, երբեմն էլ հայրենասիրական յոյզեր, որ միաձայն երգում էր բանաստեղծը:

Այդ խանդուտ ճիւղի վարպետներն էօլացի են՝ Ալկէ ու Սափօ, որոնց օրինակին հետեւ է նաև իօնացի Անակրէոնը:

Լեսրոս կղզում գոյութիւն ունէին դպրոցներ, ուր բանաստեղծները սովորեցնում էին ոտանաւոր հիւսելու արուեստը և «քարքիտոս» նուագել: Այդ գործիքը տեղական բնաւորութիւն ունէր և բազմալար լինելով՝ ընդունակ էր արտայայտելու հարուստ եղանակներ:

Գալով երգի չափին՝ կոչւում էր լոգաէղեան, որ ստացում էր արոքէների (— -) մէջ ամփոփուած դակախից (— -) և նման բարդութիւններից:

Էօլիայի ամենամեծ քնարերգուն է բանաստեղծուհի Սափօն, որին Ալկէն կոչել է «Մանիշակներով պսակուած», մեղմ ու մաքուր ժպտով Սափօ....»: Նա ապրել է VI դարի սկզբում, խառնուել է քաղաքական խռովութիւններին և Պիտտակոս տիրանի հրամանով աքսորուել Սիկիլիա, որտեղից կրկին վերադարձել է Լեսրոսի Միտիլէն քաղաքը:

Իսկապէս Սափօյի կեանքը շատ անորոշ է. գիտենք, որ նա մի աղջիկ ունէր. բացի այս, իբր թէ բազմաթիւ օրիորդներ նրա մօտ սովո-

րում էին երաժշտութիւն և բանաստեղծութեան արուեստը. այդ աշակերտուհիներից ականաւորն էր իրինա, որ գրել է «Հլիկ» անունով մի ուտանաւոր՝ բաղկացած երեք հարիւր տողից:

Շատերը Սափօյին վերագրում են կենսագրական անվայել գծեր, որոնք սակայն զուրկ լինելով հիմքերից՝ իրաւունք չեն տալիս կասկածելու նրա բարոյականութեան մասին. այդ տեսակէտից հրահանգիչ է Սափօյի պատասխանը՝ ուղղուած Ալկէին. «Եթէ գեղեցկի և լաւի ցանկութիւնն է քեզ դրդում. եթէ լեզուդ ոչ մի վատ բառ չէ պատրաստում, ամօթը չի պատէք ու աչքերը և դու համարձակօրէն կասես մտածածդ»:

Ինն հատոր գրուածքներ է ունեցել նա, բայց փոքր բեկորներ ու երկու լրիւ երգ են միայն հասել մեր ձեռքը:

Նրա նիւթն եղել է գլխաւորապէս սէրը՝ մեծ մասամբ խանդավառ, երբեմն արտում, ծաղիկներով ու շնորհալի նազանքով լի: Սափօն յատկապէս սիրել է վարդը, մանիշակը և յակինթը, որոնց հետ յաճախ միամտօրէն հիւսել է ու համեմատել իւր աղջկայ և ընկերուհիների անունները.

«Քնքոյշ ձեռներովկդ, ով Դիկէ, ոլորիր պըսակներ ծամերիդ, որովհետեւ գեղեցիկ ծաղիկները կրկնապատկում են շնորհքը, մինչդեռ անպսակ ծակտից խուսափում են բոլորը»:

Կամ թէ, ցոյց տալու համար, թէ ինչոր անտաղանդ բանաստեղծուհի կը մոռացուի ապագայում, ասում է.

«Դու կը մեռնես և այն ժամանակ էլ ոչինչ քեզնից չի մնայ, որովհետեւ Պիէրիայի վարդերի մէջ մաս չունիս դու. իբրև Աղեսի տան խաւար ընակիչ, կը թափառիս անյայտ մեռեաների հետ»:

Սաֆօն գրել է նոյնպէս՝ հարսանիքի երգերու գեղեցիկ տապանագրելը, որոնցից է հետեւեալը.

«Այստեղ հանգչում է աճիւնը Տիմասի, որ դեռ չամուսնացած՝ մտաւ մահուան մոայլ մահիճը. երբ նա մեռաւ, բոլոր ընկերուհիները սուր երկաթով կտրեցին իրենց գեղեցիկ մագերը»:

ԱՆԱԿՐԵՈՆ (VI դ.)

Անակրէոնը, որ իօնական դպրոցի վարպետն է, ծնուել է Թէոս քաղաքում, մօտաւորապէս 570—560 թուականներին։ Նրա ամբողջ կեանքն անցել է ժամանակի այլևայլ արքունիքներում. նա իւր գեղեցիկ երգերով զարդարել է այս կամ այն տիրանի ժամերը։ Ակզրում ապրել է նա Պոլիլրատի մօտ՝ Սամոս կղզում, յետոյ գնացել Հիպարքոսի պալատը. նրան հրաւիրել են նոյնպէս Թեսալիա. վերջը իրը թէ վերադարձել է

հայրենիք և այնտեղ էլ մեռել ծերութեան հասակում։

Անակրէոնի անունով մեզ հասած փոքրաթիւ երգերի վաւերական լինելը նոյնիսկ շատ վիճելի է, որովհետեւ բանաստեղծի մահից յետոյ դարեր շարունակ բազմաթիւ մարդիկ հետեւելով նրա օրինակին՝ նման երգեր են շարադրել ու վերագրել Անակրէոնին. այսպէս որ այսօր իսկականներն ու կեղծերը խառնուել են իրար հետ, և դժուար է որևէ ճիշտ ընտրութիւն անել։ Մի բան սակայն դուրս է ամեն կասկածից, այն որ եթէ այդ կտորները մեր հեղինակինն իսկ չըլինեն, յամենայն դէպս, ինչպէս մօտիկ նմանողութիւններ, բացազրում են թէոսցի երգչի ընտրած նիւթերի բնաւորութիւնը, մշակման ձևի յատկանիշները։

Նախ և առաջ գինու և սիրոյ բանաստեղծ է նա, մեղմ ու զգայնական հաճոյքների աշուղ։

«Մի օր պսակ հիւսելիս, վարդերի մէջ նըկատեցի Սէրին. բռնեցի իւր թեսերից և սուզեցի զինու մէջ. յետոյ իսկոյն դատարկեցի բաժակը. մինչեւ այսօր էլ զգում եմ ես իմ կրծքում իւր թեսերի թրթիոը»։

Նա չէ սիրում բռնութիւն, կոիւ, արիւն և հարբեցողութիւն, ոչ. նրա ցանկութիւնն է ճաշակել կեանքը գեղեցիկ մանկաւիկների ու կանանց շրջանում, նստել ճոխ զարդարուած սեղանի առջև, զուարթանալ գինով, երգել հեշտա-

լի տաղեր, նոյնիսկ ներողամիտ կերպով ժպտալ մերժողներին և այսպէս համնել գերեզման, որտեղից «Էլ ոչ ոք լոյս աշխարհ չէ բարձրանում»։ «Ո՞հ, տուէք ինձ Հոմերոսի քնարը, բայց առանց իւր արինաներկ լարերի. բերէք ինձի բաժակներ, որոնց վրայ իշխում է խնճոյքների օրէնքը……»։

ԽՄԲԵՐԳ. ՊԵՆԴԱՐ (521—441 թ.)

Բացի միաձայն երգից, Յունաստանում զարդացել էր նաև խմբերգը, որ աւելի հանդիսաւոր բնաւորութիւն ունէր և սկիզբ էր առել դարձեալ կրօնական ծէսերից։ Նա իւր մէջ պարունակում էր ոչ միայն բանաստեղծի հայեացքն ու զգացմունքները, այլ և քաղաքի կամ համայնքի միացեալ հոգին, երբ ազգային կամ կրօնական տօների ժամանակ երգում էր խումբը և պարում, այն ինչ սրինգը ձայնակցում էր համապատասխան եղանակով։

Այդ շարքի հեղինակներից ամենանշանաւորն էր Պինդարը. նա ծնուել է 521-ին, կինոկեֆալ գիւղում՝ Թերեսի մօտ, որից ոչ հեռու գտնւում էր Հելիկոն լեռը՝ նուիրուած մուսաներին։ Բացի այս, յայտնի է, որ բանաստեղծի նախահայրերն էին հիմնել վերոյիշեալ քաղաքը և մասնակցել նոյնպէս մեծ արշաւանքների։ Նրա ծընդունակութան օրը Դելֆում կատարում էին Ապոլլոնի

տօնը, երբ ժողովուրդը պիթակեան խաղերով փառաբանում էր իւր պաշտպան աստծուն՝ Ապոլլոնին, յաղթողներին պարգևելով դափնիներ։ Վերջապէս Պինդարենց տանը ժառանգաբար նուագում էին և երգում. կը նշանակէ ապագայ մեծ երգչի ծագումն էլ, շրջապատն էլ, ինչպէս և հասարակական մթնոլորտը հէնց մանկութիւնից նպաստելու էին նրա բնական ձիրքերին։ Սկզբում նրա դաստիարակութիւնն յանձնուած է եղել Կորին և Միրած բանաստեղծուհիներին. սակայն որոշ ժամանակ անցնելուց յետոյ, նա գնում է Աթէնք՝ աւելի ևս կատարելագործելու իւր արուեստը։

Շուտով սկսուեցին պարսկական արշաւանքները և հելենների փառաւոր յաղթութիւնները, Մարատոնում և Սալամենում, մեծապէս ազնուացըրին Պինդարի ներբողները։

Նա ունէր կին ու որդի. մի անգամ Ապոլլոնի տօնին քաղաքացիք յարգելու համար բանաստեղծին՝ նրա որդուն ընտրեցին դափնիկիրների թափօրին մասնակցելու, երբ աղջիկների խումբըն երգում էր Պինդարի յօրինած ներբողներից մէկը։ Նրան անմահացնելու համար, VII Ոլիմպիականը փորագրել տուին Աթենէի տաճարում։ Նոյնիսկ մահից յետոյ, որ տեղի ունեցաւ 441-ին, Արգոսում, շարունակում էին յարգել նրան. այսպէս՝ երբ 335-ին Աղէքսանդր Մեծն առաւթերեսը, հրամայեց, որ ընդհանուր աւերումի

մէջ անկործան մնար այն տունը, որտեղ մի ժամանակ ապրել էր Պինդարը:

Երկերից մնացել են 44 ներբող. սրանցից 14 հատը կոչւում են Ոլիմպիական, 12-ը՝ Պիթակեան, 11-ը՝ Նեմէչական և 7 հատն էլ Պարանոցեան: Այդ անունները համապատասխանում էին Ռիմպոսում, Դելֆում, Պիոնտում և Կորնթոսում պարբերաբար տեղի ունեցող խաղերին, որոնցից առաջինը նուիրուած էր Զևսին, երկրորդը՝ Ապոլլոնին, երրորդը՝ Հերկուլէսին, իսկ չորրորդը՝ Պոսեյտոնին: Պինդարը փառաբանում էր այդ խաղերի մէջ յաղթող հանդիսացողներին:

Եթէ մեզ համար այսօր այնքան էլ ըմբռունելի չէ նրա ներբողների հմայքը, պատճառն այն է, որ մենք պարզապէս կարդում ենք այն, ինչոր յոյները սրնդի ձայնակցութեամբ երգում էին ու պարում, և այն էլ կրօնական տօների առթիւ. չորսդին խոնուած էին լինում հանդիսականները, կառքի վրայ բազմած գալիս էր պսակազարդ յաղթողը, ոգեսրուում էին մարդիկ, առասպեկների ու կրօնական զգացմունքների երամները ծածանուում էին տաճարների շուրջը խոնուած այդ հոգիների մէջ և հնչում էր ներբողը, իբր կենդանի արձագանք նրանց բոլորի վսեմ յոյզերի: Այսօր սակայն փոխուել է կեանքը, մեռել յունարէնը և մենք բառարանների ու պատմութեան օգնութեամբ միայն կարդալով Պինդարի տողերը՝ չենք կարողանում

զգալ նրանց երբեմնի խանդը, որ հնում համեմատում էին մերթ կրակի, մերթ արծուի թըռովչքի և կամ հեղեղի հետ:

Բայց և այնպէս աշխատենք վերլուծել գոնէ նրա գաղափարները, որոնք յունական մտքի գարգացման մի նոր փուլն են կազմում: Իրօք, Յունաստանում, VII և V դարերի միացման սահմաններում, գոյութիւն ունէին գաղափարների երկու խումբ. հասարակութեան մի մասը երկըրպագում էր Հոմերոսի և Հեզիոդի աստուածներին, իսկ միւսը, որ բաղկացած էր Փիլիսոփաներից (Հերակլիտ, Քսենոփան), այլ ևս չէր հաւատում աւանդական զօրութիւններին: Պինդարը, իբր մուսաների սիրեցեալ, պատկանում էր բնականաբար առաջին խմբին: Սակայն նրա կրօնական վարդապետութիւնը տարբերւում էր իլիականի դիւցաբանութիւնից. Պինդարի աստուածներն աւելի կատարեալ ու գեղեցիկ էին. « . . . նվ Ապոլլոն, դու գիտես վախճանը, ուր յանգում է ամեն ինչ. դու ճանաչում ես բոլոր ուղիները, գիտես, թէ երկիրը քանի տերև է արձակում գալնանը, ծովում ու գետերի մէջ քանի խիճ կոծւում են ալիքների գգուանքից և այն բոլորը, ինչոր լինելու է և պատճառները» (IX Պիթակեան):

Ընդհակառակն, ոչնչութիւն է մարդը, «որի մտքերի շուրջը մոլորութիւններ են միայն ծածանուում» (VII Ոլիմպ.): Ուստի մեր կեանքը

կարող է քաղցրանալ այն ժամանակ. միայն, երբ «աստուածները մի ճառագայթ ուղղեն մեր վերայ» (VIII Պիթակ.):

Երկնային զօրութիւնների մասին ունեցած այդ վսեմ հայեացքը դրդել է Պինդարին սրբագրել այն անվայել գծերը, որ աւանդութիւնները վերագրում էին աստուածներին: Առաջին Ոյիմպիականի մէջ նա բացարձակապէս ասում է, որ «մարդ պէտք է աստուածներին գեղեցիկ յատկանիշներ միայն վերագրէ. այսպիսով նա իրեն աւելի քիչ կենթարկէ քննադատութեան, մանաւանդ՝ որ մարդու միտքը սխալական է միշտ: Ուստի, ով Տանտալի որդի, քեզ երգելու համար, իմ նախորդների ընտրած ճանապարհի հակառակն եմ ընտրելու ես: Երբ քո հայրը մի օր հրաւիրեց անմահներին հրաշալի խնճոյքի, իւր սիրելի Սիպիլում, որտեղ նա ուզում էր հիւրասիրութիւն ցոլց տալ նրանց, եռաժանուաստուածը վերցրեց քեզ ու՝ ոսկեղէն կառքի մէջ դրած՝ տարաւ եթերեայ պալատը, որտեղ իշխում է օգոստափառ Զևսը.... Հէնց որ անյայտացար և մանրակրկիտ խուզարկութիւններն անգամ չը կարողացան քեզ վերադարձնել մօրդ, իսկոյն մի չարասիրտ դրացի պատմեց ցածրածայն, թէ կրակի վրայ դրուած կաթսայի մէջ էին ձգել քեզ կտրտած, և խաշելով՝ բերել էին սեղանի շուրջը հաւաքուած հիւրերին, որոնք կերել էին քեզ մինչև վերջին պատառը: Ես չեմ

կարող աստուածներին վերագրել այդպիսի որկրամոլութիւն....»:

Տեսնում ենք, որ գոյութիւն ունեցող առասպեկն ու հեղինակի ընդունած ձեզ բոլորովին տարբեր են: Այդպիսի բազմաթիւ օրինակներ կարելի է գտնել Պինդարի ներբողների մէջ, ուր աստուածները կատարեալ էակներ են, հետեաբար նրանց մէջ չը կան աստիճաններ գերազանցութեան կամ ստորնութեան, ապա ուրեմն նըրանք ներկայացնում են միութիւն, այս պատճառով էլ մի տեղ բանսատեղծը բացականչում է. «Ի՞նչ է և ի՞նչ չէ աստուած. աստուած ամեն ինչ է»:

Ճիշտ է նա երբեմն տխուր խորհրդածութիւններ է անում մարդկային կեանքի մասին, սակայն այդ թախիծը նրան յոռետես չէ դարձնում, անգործութեան չէ մատնում նրա կորովը ընդհակառակն. ձիերը, կառքերը, արշաւանքները, մրցութիւնը, յաղթանակը, ուժի և ճարպիկութեան ակնահաճոյ տեսարանները ոգևորում են նրան կը կէսում և նա երգում է ջանքի ու փառքի գեղեցկութիւնը: Նոյն իսկ մահը մուայլ ոչնչութեան նախադուռ չէ նրա համար, այլ սկիզբ յաւիտենական վարձատրութեան՝ ըստ արժանիքների:

Աշխարհում պէտք է լինել առաքինի, յարգել ծնողներին և աստուածներին, ներել թշնամուն, ատել կեղծիքը, լինել բարեկամ ճշմար-


տութեան, լինել կողմնակից արիստոկրատ, չափաւոր ու խելացի կառավարութեան։ Արդէն Պինդարի կեանքը մի մեծ գրաւական է այդ սկզբունքների անկեղծութեան։ Երբէք ոչ մի իշխանի մօտ նա չէ ստորացրել իրեն երեսպաշտութեամբ. դա չէ նշանակում, որ նա մռայլ էր ու կոպիտ, ոչ, այլ նրա բանաստեղծական պատգամների խրատական ու բարոյական մասն ընդհանուր բնաւորութիւն ունենալով՝ ուղղում էր մարդկանց, առանց վիրաւորելու անձնականը։

Սակայն և այնպէս այս բոլոր գաղափարները, որոնք այնքան գորիական լրջութիւն ունէին և փիլիսոփայական արժէք այն գարում, անկարող կը լինէին դասել Պինդարին մեծ բանաստեղծների շարքը, եթէ նրա արուեստը իւր նիւթի չափ վսեմ չը լինէր։ Իսկապէս նրա վրձինը երբէք չէ մտնում չնշին գծերի ու մանրամասնութեանց մէջ, այլ առողջ ու լայն հայեացքով գրկում է տպարութեան էական մասը. օրինակի համար. «Սիրում եմ ես գովարանել հերկուէսին, սիրում եմ ես պատմել նրա մեծ գործերի հին զրոյցներն։ Հազիւ էր նա աշխարհ եկել մօր արգանդից, ու երկորեակ եղբօրը հետ ճաճանչաւոր լոյսը տեսել. հազիւ նրան պատել էին սաֆրանեգոյն պարուբներով, երբոր հերան (Զեսի կինը, որին ամուսինը դաւաճանել էր՝ սիրելով հերակլէսի մօրը) տեսաւ նրան։ Իսկոյն և եթ անմահների այդ թագուհին, որ բազմում է ու-

կէ գահի վրայ, մոլեգնաբար նայեց նրան և ուղարկեց երկու մեծ օձ, որ զրկեն նրան կեանքից։ Արքունիքի բոլոր գոներն բաց էին. հրէշները մտան իսկոյն այն սենեակը, որտեղ քնած էին մանուկները։ Իրենց ճկուն ճնօտներով յօշոտելու տենչը արդէն վառում էր զոյգ օձերին։ Բայց չերակլէս բարձրացրել էր գլուխը՝ մղելու իւր առաջին կոփեր։ Անյաղթելի ձեռքերովը բռնեց իսկոյն հրէշների վզերից, երկար սեղմեց, ու սոսկալի մարմիններից կեանքը ցնդեց։ Մեռելային ահով բռնուած՝ սառել էր սիրտը կանանց, որոնք այնտեղ հսկում էին անկողնի մօտ թագուհու. մինչդեռ վերջինս, առանց զգեստի, նետուեց մահճից, որ միայնակ պաշտպանէ իւր որդիներին ճիւազների մոլեգնութիւնից։ Շուտով կազմէացոց սետերը մօտ վագեցին արուրազին. նախ և առաջ Անֆիտրիոնը շողացըեց սերկ սուսերը... բայց կանգ առաւ զարմացած. իւր յուզմունքին խառնուում է հրճուանքը. նա տեսնում է արտասովոր քաջութիւնը և կորովը իւր որդու...» (I Նեմէական)։

Այս ներբողը գրուած է սիկիլիացի Քրոմիուսի յաղթութեան առթիւ. բայց տեսնում ենք, որ բանաստեղծը դիւցաբանական զբոյցներ ևս խառնել է այդ նիւթին։ Իսկապէս Պինդարն այս կամ այն մարդուն երգելով միայն չէ բաւականանում, այլ իւր նիւթերին միացնում է նաև տատուածների ու դիւցագների այն առասպել-

ները, որոնք որևէ կապ ունեն իւր հերոսի կամ տօնի հետ. միաժամանակ նկարագրում է խաղը, պատմում յաղթողի ծագումը, անցեալը, գովաբանումնշանաւոր գործերը, պարսաւում է մարդկային կեանքի արատները, ոգևորում հանդիսականներին. այսպիսով՝ ըստ երեսյթին միակերպ եղող նիւթերը դառնում են այլազան: Եթէ ելլադայի աղքային խաղերը նրա ներբողներին տուել են միութեան կնիք, հեղինակի հանճարն էլ ըդգացմունքների, գոյների ու գաղափարների անսպառ ճոխութեամբ հարստացրել է այդ միւթեան մասերը, որոնց մէջ թրթում է ոգևորութեան կըակը:



ԹԱՏԵՐԴՈՒԹԻՒՆ

Յունաստանում Վ դարի պատմական մեծ երեսյթն է Աթէնքի գերիշանութիւնը: Մինչև այդ ժամանակ բազմաթիւ քաղաքներ անկախու հաւասար ուժով ապրում էին ելլադայում, բայց այժմ, պարսից անյաջող արշաւանքներից յետոյ, Աթէնքը դառնում է քաղաքական ամենազօրեղ կենտրոնը, ուր ձգտում են բոլորը՝ ցոյց տալու իրենց շնորհքը կամ տեսնելու եղած հըրաշալիքները: Ճարտարապետ, բանաստեղծ, անդրիագործ, փիլիսոփայ, ճարտասան ու զօրապետ, բոլորն հաւաքւում են այնտեղ. սկսում է ատտիքական քաղաքակրթութեան ոսկեդարը, որը վաղուց, դանդաղ աստիճանաւորութեամբ, զարգանում էր, և այժմ, Մարտոնի ու Սալամինի ճակատամարտներից յետոյ, իւր մեծութեան ամբողջ գիտակցութեամբ, հրապարակ է գալիս՝ ամփոփելով յունական բոլոր ընտիր յատկանիշները, ինչպէս որ էր նաև Ստահկէում գործածուող լեզուն:

Հենց այդ լնդհանրական և միենոյն ժամանակ ինքնուրոյն գծերի շնորհիւ է, որ Աթէնքի քաղաքակրթութիւնը դարձաւ հելլենական ամբողջ ցեղի սեփականութիւն և մեծապէս նպաստեց

նաև թատրոնի զարգացման. չէ որ պիեսը դիմում է հասարակութեան բոլոր խաւերին, հետևաբար հիմնում է այն տարրերի վրայ, որոնք հասկանալի են բոլոր ունկնդիրների համար. սըրանք կարող են լինել, և էին, բնիկ, գորիացի, թեսալիացի կամ որևէ գաղութից: Խսկապէս համազգային հանդէսի բնաւորութիւն ունէր իւրաքանչիւր ներկայացում, որ տեղի էր ունենում կրօնական տօների առթիւ: Եթէ իօնիան ստեղծեց գիւցազներգութիւնը, Դորիան՝ խմբերգը, Աթէնքն էլ կազմակերպեց տրագետեան:

Վերջին բառը բաղկացած է «այծ» և «երգ» խօսքերից. բաքըսի ուղեկիցները սատիրներ էին, որոնք այծի ոտներով ու եղջւրներով էին պատկերացւում, ուստի այդ աստուծոյ պատուին կատարուած ծէսերին երգիչներն հագնում էին այծի մորթ:

Տեսնում ենք, որ թատրոնի ծագումը կապուած է գինու աստուծոյ պաշտամունքի հետ: Նրա տօնը կատարելիս, զոհի սեղանի շուրջը պարում էին և երգում նրա կեանքի ուրախ և տխուր գէպքերը (ηθοθիρամբ), որոնք համապատասխանում էին այգիների ծաղկումին և թառամելուն, երբ ժողովուրդն արտայայտում էր իւր խնդակցութիւնը կամ կարեկցութբւնը Բաքըսի յաղթութեան կամ պարտութեան առթիւ:

Ժամանակի ընթացքում այդ արարողութիւններից յառաջ եկաւ ճշմարիտ ողբերգութիւնը,

որի հիմքը նոյնպէս կազմում է հասարակութեան վշտակցութիւնը ներումների նկատմամբ, և որի մէջ նոյնպէս գեր էր կատարում «խորոսը» կամ խմբերգը, ներկայացւում էր Բաքըսի տօներին և պահպանում իւր ծագման ստուգաբանութիւնը:

Բազմաթիւ բանաստեղծներ ու դարեր են անհրաժեշտ եղել մինչև իսկական ողբերգութեան կազմակերպուելը: Այդ ուղղութեամբ աշխատող վարպետներից էր Թեսպիսը, որ ծնուել է վեցերորդ դարի կէսերին և արդէն 535 թուին թատերգութեան մրցանակ ստացել Պիսիստրատի օրով. Նրա հայրենիքն էր Իկարիա գիւղը՝ ոչ հեռու Մարատոնից:

Թեսպիսը, նախ և առաջ, պատմուածքներ աւելացրեց նախկին անկերպարան ծէսերին, որով գծագրեց պիեսի որոշ ուրուանկար. բացի այս, նա խմբից անջատեց մէկին՝ նշանակելով նրան գերասան, որը կատարում էր Բաքըսի կամ մի այլ անձնաւորութեան դերը, խօսակցութեան մէջ մտնում խմբի հետ, մի խօսքով ստեղծում էր երկախօսութիւնը՝ դիալօգը:

Այժմ մնում էր զուտ կրօնական ու միակերպ թեմայից անցել ազգային ու ներսական նիւթերի, ունենալ իսկական թատերգութիւն: Այդ ևս արեց նա՝ օգտուելով Հոմերոսի և այլոց զրոյցներից, որոնք ծանօթ ու սիրելի էին բոլորին և թատերգութեան մօտեցող. արդէն հսում աշուղներն երբեմն իրար մէջ բաժանելով

Իլիականի զանազան անձնաւորութեանց դերերը՝
երգում էին փոխընդիոխ և այսպիսով գոնէ մա-
սամբ հարթում նաև ապագայ բեմի ուղին:

Բայց յոյները պահպանողական ժողովուրդ
էին. միայն աստիճանական զարգացումը կարող
էր նրանց համար ընդունելի համարուել, ուստի
թեսպիսի յանդուգն քայլերի դէմ բողոքեցին
ծերունիները՝ առարկելով թէ աղաւաղուել է
գինու աստուծոյ պաշտամունքը: Թէ մէկ և թէ
միւս կողմին բաւարարութիւն տալու նպատա-
կով էր, որ բանաստեղծները, դրամատիքական
մրցումներին մասնակցելիս, ստիպուեցին ներ-
կայացնել երեք ողբերգութիւն, հետն էլ մի սա-
տիրական դրամա, որը մնացորդ էր հին դիթի-
րամբին և զուարթացնում էր հանդիսականների
ստացած խոր տպաւորութիւնը ողբերգութեան
ներկայացումից: Դարձեալ իւր ծագման անա-
ղարտութիւնը պահպանելու համար էր, որ ող-
բերգութեան մէջ, ինչպէս ասացինք, մինչև վեր-
ջը մնաց խմբերգը, որին նպաստեց նաև ժամա-
նակակից քնարական բանաստեղծութիւնը, և ու-
րի պաշտօնն էր գործողութեան ընդմիջումներին
արտայայտել հասարակութեան զգացմունքները
տեղի ունեցող դէպերի նկատմամբ: Այդ ընդ-
միջումներն անջատում էին պիէսի մասերն
(prologue, épisodes, exode) իրարուց և համա-
պատասխանում արդի միջարարներին. ուրեմն
յունական ներկայացումներն էապէս չէին ընդ-

հատւում: Բայց խորոսը կարող էր նաև հէնց
գործողութեան ընթացքում խօսակցութեան մէջ
մանել դերասանների հետ, որոնց թիւը եսքիլէսն
հասցրել էր երկուսի. յետոյ էլ Սոֆոկլէսն աւե-
լացրեց մի երրորդը, և այդ քանակն անփոփոխ
մնաց նաև եւրեպիսի օրավ:

Գալով թատրոնական շէնքին՝ բաւական նը-
ման էր արդի հիմարկութիւններին, այսինքն՝
ամֆիթէատրոնները կիսաշրջանների ձևով բարձ-
րանում էին աստիճանաբար. նրանց հանդէպ
զետեղուած էր բեմը, իսկ երկուսի մէջտեղում
գտնում էր օրքեստրը և Բաքքոսի սեղանը, ու-
րի շուրջը երգում էր ու պարում երգիչների
խումբը:

Թատրոնը շինուած էր լինում բլբի լանջին,
քարէ նոտարաններ ու յատակ ունէր, առանց
առաստաղի: Ներկայացումները կատարում էին
ցերեկը՝ բաց երկնքի տակ. այդ բանին նպաս-
տում էր Յունաստանի մեղմ կլիման. և յետոյ
նրանց կրօնական աշխարհայեացքը մարդուն կա-
պում էր աստուածների հետ, որոնք բնական
տարրերի մարմացումներն էին, ապրում նրանց
հետ, էլ ինչու ներկայացումները ծածուկ կատա-
րէին, մութ շէնքերի մէջ և առանց արեի ու
երկնքի մասնակցութեան:

Յունական թատրոնները շատ աւելի ընդար-
ձակ էին, քան արդի շէնքերը. այսպէս՝ Աթէնքինը,
որ շինուած էր Ակրոպոլի լանջին, ունէր 30,000

տեղ, որոնք բոլորն էլ բռնւում էին ներկայացման օրերին, երբ հարուստ և աղքատ, բանաստեղծ ու առևտրական, տեղացի թէ օտարական խռնւում էին լսելու աստուածների ու հերոսների արարքը և ազնուացնում իրենց հոգին:

Ինչ վերաբերում է դեկորներին, այդ արուեստն էլ բաւարար զարգացման էր հասել. բեմի խորքի պատն ունենում էր մեծ պատուհաններ կամ դռներ, որտեղ դնում էին համապատասխան տեսարանների նկարները՝ տաճար, պալատ, ծով կամ անտառ՝ օգտուելով նոյնիսկ հեռուից երեացող բնական պատկերներից:

Բեմում ընդունուած էր նաև դիմակների և բարձրադիր կօշիկների գործածութիւն:

Ոչ դերասանների թուի փոքրութիւնը, ոչ էլ դեկորների պարզութիւնը պատահական երևոյթներ չէին, այլ տրամարանական հետևանք հելլենների այն էական յատկութեան, որ ամեն տեղ լոյս ու պարզութիւն էր փնտրում. ահաւասիկ այդ միենոյն պատճառից յառաջ է եկել նաև տեղի, գործողութեան և ժամանակի միութեան նախապատւութիւնը ողբերգութեան մէջ, որի ամենամեծ վարպետներն են էսքիլէսը, Սոփոկլէսն ու Եւրիպիդը:

ԷՄՔԻԼԵՍ (525—456 թ.)

Էսքիլէսը ծնուել է տաճարների մօտ՝ էլեղիսում, որը հեռու չէ Աթէնքից: Նրա գերդաստանն արիստոկրատ էր և ջերմեռանդ, մի տեսակ հապատ ու հնաւանդ մթնոլորտ, որ էսքիլէսին ու նրա երկերին տուել է անընկճելի կորվի ու գոռոզութեան հրամայող շեշտ: Նա մասնակցել է Մարտառնի և Սալամինի ճակատամարտներին, քաջութեամբ պաշտպանել հայրենիքը:

Բայց մեծ քաղաքացի լինելուց զատ՝ նաև մեծ բանաստեղծ էր նա. գրած ութառուն պիէսներից շատերը մրցանակ են ստացել: Նոյնիսկ հայրենիքից հեռու տարածուել էր նրա հոչակը. Երբ 460 թուին Սիկիլիա գնաց նա, մեծ պատուով ընդունեցին նրան. այնտեղ գրեց մի քանի ողբերգութիւն, որոնք խաղացուեցին տեղական թատրոններում: Նա մեռաւ 69 տարեկան հասակում, Սիկիլիայի Գելա քաղաքում: Նրա ժառանգներն էին երկու որդիները, որոնք նոյնպէս ողբերգուներ էին, թէև փոքրիկ տաղանդով:

Էսքիլէսի գործերեց մեզ հասել են եօթը ողբերգութիւն՝ «Աղերսումներ», «Պարսիկներ», «Եօթը ընդդէմ թերեսի», «Շղթայուած Պրոմեթէոս», «Աղամեմոն» և այլն, բոլորն էլ չափածոյ:

Քննենք «Շղթայուած Պրոմեթէոսը», որ սկզբում բաղկացած է եղել երեք մասից, և որի նիւթն է հետևեալը: Տիտան Պրոմեթէոսը մարդկանց սովորեցրել էր կրակի գործածութիւնը

և արուեստներ. այս բանի վրայ՝ Զեսը բարկացած հրամայում է Հեփեստոսին բեեռել նրան ժայռերին։ Մենակ մնալով՝ Պրոմեթէոս սկսում է արտնջալ աստուածների հօր անարդարութեան դէմ, վրայ է կանչում բնութիւնը։ Շուտով գալիս են Ովկէանի աղջիկները և խմբովին կարեկցութիւն յայտնում նրան. Պրոմեթէոս պատմում է նրանց, որ իւր միակ յանցանքն այն է եղել, որ կրակ բերելով մարդուն՝ հիմք է դրել գիտութեանց և արուեստներին. Յետոյ երևան է գալիս ծերունի Ովկէանը, որ հեծած է մի թևաւոր վիշապ. նա խորհուրդ է տալիս տիտանին զղջալ իւր արածի վրայ, հնագանդիլ Զեսին և այսպիսով ազատուել շղթաներից։ Բայց ոչինչ չէ կարող ընկճել Պրոմեթէոսին. ի՞նչ յանցանք էր գործել նա, որ մարդկութեան բարերարն էր։ Ապա յայտնւում է իօն, ինաքի գեղեցիկ աղջիկը, որին Հերան՝ նախանձից դրդուած՝ տուել էր կովի եղջիւրներ, և նա թափառելու էր երկրից երկիր։ Բայց Պրոմեթէոսը գիտէ մի գաղտնիք, որով մի օր Զեսին կը կործանեն։ Աստուածների հայրն սկսում է թէ անհանգստանալ և թէ հետաքրքրուել, ուստի ուղարկում է Հերմէսին, որ իմանայ կաշկանդուած տիտանի գաղտնիքը, բայց իզուր. նա յայտնում է, որ քանի շղթայուած է ինքը, ոչինչ չէ կարող ստիպել նրան բանալու իւր ծրագրերը. թող կատաղեն հովերը, մոնչեն ալիքները, նա կը մնայ անյողդողդ և կենդանի։

Վրայ է համնում փոթորիկը և Պրոմեթէոսին շպրտում անդունդ։

Այս է էսքիլէսի հոչակաւոր ողբերգութեան բովանդակութիւնը, որ, ինչպէս տեսնում ենք, շատ պարզ է. Ժայռի վրայ Պրոմեթէոսը, շուրջը ովկիանիդների խումբն է, և հերթով հանդէս են գալիս Հեփեստոսը, Ովկէանը, իօն և Հերմէսը։ Բեմի վրայ ոչ բարդ ու բազմաթիւ գործողութիւններ և ոչ ել շատ գերակատարներ։ Իսկապէս էսքիլէսի բոլոր երկերի գլխաւոր յատկանիշներից են կազմուածքի պարզութիւնը, տիպարների մռայլ մեծութիւնը, որոնք հեղինակի ողբերգութիւններին տալիս են ինչ որ առնական հմայք, նոյն իսկ երբ յուսահատօրէն տրտնջում էնա. Նրան հետաքրքրողը միշտ մի կենտրոնական անձնաւորութիւն է՝ վսեմ, սոսկալի և հերոսական, որ կուռի է բռնւում ճակատագրի հետ. այդ պայքարի տպաւորութիւնը խմբին ներշնչում է քնարական գմայելի երգեր, զուգընթացօրէն արծարծւում է մի փիլիսոփայական մեծ գաղափար, սկզբից և եթ հանդէս են գալիս պատրաստութիւնց։

Թերևս առարկեն, որ էսքիլէսի տիպերը գրեթէ անշարժ են. նրանք աստիճաննաբար չեն մեծանում կամ փոքրանում մեր աչքի առջե, այլ մնում են զրեթէ անփոփոխ։ Միւս կողմէց սակայն ոչ մի հեղինակ նրա պէս մի անգամից չէ կարսղանում ստեղծել ճշմարիտ հերոսներ.

այս պատճառով էլ, եթէ նրա հանճարը չէ վերալում զգացմունքների բոլոր երանգները, լայն շարադասութեանց մէջ չէ մտնում, դրա փոխարէն տալիս է հերոսներ, որոնց դիմագծերն անջընջելի են մնում մեր յիշողութեան մէջ հէնց իրենց պարզութեան շնորհիւ:

Այսպէս՝ Պրոմեթէոսի կամքի ոյժը, արարքի գիտակցութիւնը և ոչ մի պայմանով զիջելու, ընկճուելու հակում չունենալը համաշխարհային մեծ տիպարի են նմանեցնում նրան. նա մարդկային ստեղծագործող ոգին է, որ, կատարելագործուելու համար, անվիճեր ձգտում է դէպի յառաջ. նրան յոյս է ներշնչում ապագան:

Երկրորդ տեղը պատկանում է Զեսին. սա թէ աստուածների հայրն է կամ թէ ընութեան կոյր ուժերի մարմնացումը, ճակատագրի նման մի գօրութիւն, բայց և այնպէս վախենում է շղթայուած տիտանի գիտցած դադանիքից, որովհետև ոչ մի գիտակցական իդէալ չը կայ իւր արարքի մէջ։ Պիէսի սկզբից մինչև վերջը կարծես հանդիսատեսի աչքում հետզհետէ փոքրանում է բացակայ եղող ահարկու Զեսը, և, ընդհակառակն, նրա զոհն իւր դժբաղդ տեղովն անգամ մեծանում է, ուժեղանու՞։

Հակադրեցէք այդ երկու գլխաւոր կերպարանքներին (ընութիւն և մարդ) գեղուհի Իօյին, որը զոհ է դարձել Հերայի նախանձին, որովհետև Զեսը սիրում էր նրան։ Այդ աղջիկն ու

Պրոմեթէոսը ճակատագրի ընկերներ են. մէկը տուժում է Զեսի սիրուց, իսկ միւսը՝ ցասումից. կը նշանակէ մարդը ընութեան ձեռքի մէջ տանջուելու է միշտ. նրա համար երջանկութիւն չը կայ, քանի բիրտ ուժերն են երկրի տէրերը։

Իօն կարծես անկապ է խօսում. արտաքինը կիսակենդանական է. անսպասելի կերպով մէջտեղ է գալիս և յանկարծակի չքանում. այդ գծերով Էսքիլէսը հրաշալիօրէն արտայայտել է նրա առասպելական կենսագրութիւնը։

Այս բոլորից յետոյ էլ Ովկէանի աղջկանց քնքոյշը բուրմունքը, թեսերի մեղմ թափահարումը, երգերի քնարական փափկութիւնն ու տրտունջը, ինչպէս և պէյզաժի վսեմ պարզութիւնը բանաստեղծական մի ամբողջ մթնոլորտ են տալիս այդ պիէսին, որի մէջ արտայայտուած է այն գեղեցիկ գաղափարը, թէ ուրիշների բարօրութեան համար զոհուելը մի մեծ հմայք և ոյժ ունի. քրիստոնէութիւնը գրեթէ նոյնն էր ասում։

ՍՈՅՈԿԱՆ (495—405 թ.)

Սոֆոկլէսը ծնուել է 497—495 թուերին, Աթէնքի մօտ՝ Կոլոնում, և ընտանեկան երջանիկ յարկի տակ մեծացել կայտառ ու մեղմ բընաւորութեամբ։ Տասնըվեց տարեկան էր նա, երբ ընտարուեց մասնակցելու Սալամինի յաղթական տօներին, և քնարը ձեռքին դեկավարում էր պատանիների խումբը։ Այնքան բարեկազմ ու

գեղեցիկ էր նա, որ երբեմն էլ աղջկայ դեր էր կատարում թատրոնում:

Իսկապէս Աթէնքի ամենափայլուն օրերն էին. Պերիկլէսը կառավարում էր երկիրը, ֆիդիասը՝ կերտում Պարթենոնը. ամէն կողմից մարդիկ դիմում էին Ատարիկէի և Յունաստանի մայրաքաղաքը՝ տեսնելու այսուեղի շքեղութիւնները։ Մտքի և արուեստի տօնն էր, և Սոֆոկլէսի կեանքն էլ այդ ընդհանուր արշալոյսի ճառագայթներով ներկուած՝ ծաղկում էր երջանիկ ու փառքով լի։ Նա մըցել է մինչև անգամ էսքիլէսի հետ ու յաղթել գրուածքներից շատերը մըրցանակ են ստացել. երբէք պարտութիւն չէ կըրել նրա հանձարը։

Ժողովրդի ընտրութեամբ՝ Սոֆոկլէսը կատարել է նոյնիսկ հասարակական պատասխանատու պաշտօններ և միշտ էլ մեծ պատուով դուրս եկել իւր ըստանձնած գործից, մի բան, որ ցոյց է տալիս նրա ընդունակութիւնների բազմակողմանիութիւնը։ Միայն կեանքի վերջին տարիներում նրա որդիները, որոնք տարբեր մայրերից էին ծնուած, ժամանակաւորապէս խանգարեցին նրա հանգիստը, որ բարեխառնուած էր սրտի աղնուութեամբ ու պայծառ մտքով։ 405 թուին խաղաղ մահով մեռաւ նա. աթենացիք տաճար կանգնեցրին նրա յիշատակին և ամեն տարի գոհեր էին մատուցանում նրա տօնին։

Մօտաւորապէս 120 պիէս է գրել Սոֆոկ-

լէսը, որոնցից այսօր մնում են եօթը միայն՝ «Այաքս», «Էլէկտրա», «Քդիպ Արքայ», «Քդիպը Կոլոնում», «Անտիգոն» և այլն։

Յունական գրականութեան մէջ շատ մեծ էր էսքիլէսի կատարած դերը. Նա իսկապէս հիմք գնելով ճշմարիտ ողբերգութեան՝ դարձել էր «ողբերգութեան հայրը». Բայց տակաւին թատրոնական արուեստը չէր հասել իւր զարգացման գագաթնակէտին, դեռ շատ բան կար անելու։

Սոֆոկլէսի ուշադրութիւնը գրաւում են նախ և առաջ հերոսները, եթէ իւր մեծ նախորդի նկարած անձնաւորութիւնները տիտաննեան էին, գրեթէ կիսաստուածներ, Կոլոնիացի վարպետի պատկերացրած տիպերը աւելի սովորական են, նուազ գերբնական։ Ճիշտ է, որանք ևս ունին շատ իդէալականացրած գծեր, բայց միաժամանակ նաև թուլութիւններ, մարդկային են խորապէս։

Երկրորդ՝ Սոֆոկլէսի խմբերգը, որ կարող է մըցել յունական ամենալաւ քնարերգութեանց հետ, այլև չէ կատարում որևէ ներգործական գեր, այլ քնարական կողմնակի զգացմունքներու կարծիքներ արտայատող է միայն, հասարակութեան խղճի ներկայացուցիչը կարծես։

Առաջ երեք կամ չորս պիէս կապուած էին իրար հետ և այդպէս էլ խաղացւում էին. այնինչ հիմայ, Սոֆոկլէսի ջանքերի շնորհիւ, իւրաքանչիւր հեղինակ կարող էր մի անկախ ողբեր-

գութիւն առաջարկել մըցումի կամ ներկայացման. հետեւաբարբանաստեղծի աղատութիւնը լայնանում էր մի կողմից, իսկ միւս կողմից ամեն մի երկի վրայ աւելի մեծ ինամք ու արուեստ գործադրուելու միջոց ստեղծուում:

Եւ, ընդհակառակն, մէկով աւելացըել է նա դերասանների թիւը, որով իհարկէ աւելանում էր նաև վերլուծելու միջոցները, և նրա պիէսների մէջ կանայք աւելի մեծ դերերով են հանդէս գալիս:

Վերջապէս ճակատագրի մասին նոյնպէս տարբեր կարծիք ունի Սոֆոկլէսը: Վ գարում փիլիսոփայութիւնը (Պրստագորաս) փոքրացնում էր երկնային էակների ազգեցութիւնը, իսկ մարդուն զօրեղացնում. Սոֆոկլէսն էլ մեր ճակատագիրը համարում է նաև մեր սեփական վարժունքի ու դիտաւորութեանց արդասիք, և ոչ թէ մեզնից անկախ ծրագրուած, մի կանխագործ աստուածութեան արարքը միայն: Այս պատճառվ էլ նրա դրամայի հիմքը կազմում է մարդկային հոգու վերլուծութիւնը, որ կարիք չզգալով բազմազան ու բարդ գործողութիւնների, վիճաբանութեան միջոցով պարզում է հերոսների կամքի ոյժը, զգացմունքները, հետաքրքրութիւնը, դիմում է իւր բնական ու սրտաշարժ վախճանին:

Եթէ էսքիլէսը մարդկանց և աստուածներին ներկայացնում էր իբր հակառակորդներ, ընդ-

հակառակն Սոֆոկլէսը հաշտեցնում է նրանց գործունէութիւնը՝ առաջններին վերագրելով գիտակցութիւն և կամքի ոյժ, երկրորդներին էլ՝ գերագոյն իշխանութիւն:

Նա նուրբ արուեստագէտ է, մեծ հոգեբան, ձոխ վերլուծումներ անող, և մարդկային մտքի ու զգացմունքների վրայ է կառուցանում շէնքը իւր ողբերգութեանց, որոնք ունին անքակտելի յատակագիծ, վսեմ ու կենդանի ոճ:

Այս բոլոր յատկանիշներն ամփոփուած են «Էդիպ Արքայ»-ի մէջ, որի քննութեանն անցնելուց առաջ, գեռ յիշեցնենք հետեւեալ առասպելը, որ սերտ կապ ունի պիէսի բովանդակութեան հետ:

Լայոսը Թեբեսի արքան էր. գուշակն ասել էր նրան, որ նա կսպանուի իւր զաւկի ձեռքով, ուստի հէնց որ ծնւում է որդին, յանձնում են ծառային, որ տանէ, կորցնէ նրան: Սակայն մի հովիւ գտնում է մանկան և խղճալով յանձնում կորնթոսի թագաւոր Պոլիբին, որը որդեգրում է նրան: Անցնում են տարիներ. մեծանում է էդիպը, որին պատգամախոն յայտնում է մի օր, թէ նրան վիճակուած է սպանել հօրը և ամուսնանալ իւր մօր հետ: Անմիջապէս նա փախչում է կորնթոսից՝ կարծելով թէ խօսքը Պոլիբի և նրա կնոջ մասին է, որոնց համարում էր նա իւր ծընդուները: Բայց անկարելի էր խուսափել ճակատագրից: Ճանապարհին վէճի է բոնուում նա մի

ծերունու հետ և սպանում նրան, առանց իմաստալու, որ դա թերեսի արքան էր՝ իւր հայրը։ Ապա նրա դէմն է ենում Սփինքը, որ յիշեալ քաղաքի մօտ յօշոտում էր բոլոր նրանց, որոնք չէին կարողանում լուծել իւր առաջարկած հարցերը. էղիպը սակայն պատասխանում է գաղանին, որ, ըստ պայմանի, ընկնում է անդունդ և ջախջախւում։ Ուրախացած՝ քաղաքացիք թագաւոր են ընտրում այդ մարդուն, քանի որ նա ազատել էր նրանց փորձանքից։ Նա ամուսնանում է իւր մօր հոկաստի հետ, դարձեալ անգիտակցօրէն։

Հէնց այս կետից է Սոփոկլէսն սկսում իւր ողբերգութիւնը։ Պալատի առջե հաւաքուած ժողովուրդը խնդրում է իւր բարերար արքային ազատել նրան ժանտախտից ու սովից. թագաւորը կարեկցելով նրանց՝ ուղարկում է իւր ազգական կրէոնին՝ իմանալու պատգամախօսի կարծիքը։ Վերջինս յայտարարում է, որ եթէ պատժեն Լայոսի սպանչին, կազատուի քաղաքը։ Էղիպը խոստանում է պատժել մարդասպանին ով որ էլ լինի նա։ Բայց ինչպէս գտնել նրան. առաջարկում են քուրմ Տիրէզիասին, որ նա մարդարէութեամբ ցոյց տայ ոճրագործին, սակայն նա մերժում է. արքան յանդիմանում է նրան և մեղսակից համարում սպանութեան. քուրմը զայրացած յայտնում է, որ էղիպն է արքային սպանել։ Սակայն էղիպը մտածում է գրգռուած, որ կրէոնն ու այդ մարդն ուղում

են գահընկեց անել իրեն, որպէսզի տեղը գրաւեն. այդ պատճառով էլ զրպարտութեան են դիմում. աւելի լաւ է, ինքը վերջ տայ կրէոնի կեանքին։ Արքայի կինը՝ հոկաստը հանգստացնում է ամուսնուն՝ ասելով թէ ականջ կախելու չէ քուրմերի խօսքին. Եթէ ճիշտ լինէր նրանց գուշակութիւնները, Լայոսն էլ սպանուած կը լինէր ոչ թէ աւազակների ձեռքով, այլ իրենց որդու, մինչդեռ ամենքն էլ գիտեն, որ վերջնիս անյայտացրել են վաղուց, հէնց երեխայ հասակում։ Այժմ էղիպի կասկածը, փոխանակ փարատուելու, աւելի է մեծանում, քանի որ նա լսել էր երբեմն, որ ինքն իսկապէս օտարական էր կորընթոսում։ Վրայ են հասնում նոր վկայութիւններ, և արքան համոզւում է սոսկումով, որ իրօք սպանել է հօրը և ամուսնացել իւր մօր հետ։ Անմիջապէս անձնասպան է լինում հոկաստը, իսկ նրա թշուառ որդին՝ կուրացնելով աչքերը՝ հեռանում է քաղաքից՝ թափառելու յուսահատ։

Այս է համառօտ բովանդակութիւնը հոգեբանական մեծ դժուարութիւններով լի այդ ողբերգութեան, որ համարւում է հեղինակի գլուխգործոցը։

Ժողովուրդը սիրում է էղիպին. սա ևս վըստահ է իւր ուժի, երջանկութեան և բարութեան վրայ. Բայց յանկարծ քուրմը բաց է անում մի գաղտնիք, որ նոյնքան ահոելի է, որքան և անհաւատալի։ Կարժղ էր արդեօք Սփինքսին բաւա-

բարութիւն տուած մի մարդ պարզ արհամարհանքով վերջացնել գործը։ Նա զայրանում է նախ, որովհետև ազնիւ է. կասկածում է յետոյ, որովհետև մտածել գիտէ, և ապա յուսահատում է, որովհետև բացւում է յանցանքը, որ դատապարտելի է նաև իւր կարծիքով։ Նա համարձակ դիմել էր առաջ, հարցաքննել բոլորին, գննել շրջապատողների կարծիքն ու խիղճը, բաւարարութիւն տուել իւր վտանգաւոր հետաքրքրութեան, իսկ այժմ, ազնիւ զայրոյթով, կուրացնում է աչքերը և, գրեթէ սրբագործուած, դուրս գնում քաղաքից՝ մի մեծ կարեկցութիւն ներշնչելով հանդիսականներին։

Երկրորդ տեղը պատկանում է Իոկաստին, որն սկզբում ազատելու համար ամուսնու կեանքն ու իւր պատիւը՝ հերոսաբար ուղարկում է որդուն դէպի կորուստ։ Բայց յանկարծ երկում է, որ այդ մանուկն է սպանել Լայոսին և ամուսնացել իւր հետ, որ նրա մայրն էր։ Շանթահարւում է խեղճ կինը և իսկոյն խեղդամահ լինում, քանի որ էլ ոչինչ չէր մնում անելու։

Ի՞նչն էր սակայն այդ դժբաղդ զոյզի յանցանքը. այն, որ կարծում էին, թէ կարող էին աստուածներին հակառակիւ, ճակատագիրը խափանել։ Բայց նրանք անմեղ չէին նաև այլ պատճառով. էղիպն սպանել էր ծերունի ճամբորդին, մտածել վերջ տալ նաև կրէոնի կեանքին, հայհոյել, վիրաւորել էր Տիրեզիսափին։ Իսկ Իոկաս-

տը հեռացրել էր իւր անպաշտպան զաւկին և չէր հաւատում քուրմին ու Ապոլլոնին. այսինքն՝ բացի ճակատագրից, նրանց անհատական վարմունքը նոյնպէս դատապարտելի էր։ Նրանք այդ գիտեն շատ լաւ, ուստի և հէնց իրենք են որոշում իրենց խիստ դատաստանը։ Մէկի կուրանալը, միւսի անձնասպանութիւնը սեփական դատավճիռներ են՝ անկախ աստուածների կամքից։

Այդպիսի ճշտութեամբ նկարուած են նոյնպէս միւս դէպքերն ու դերերը, որոնք բոլորն էլ ձգտում են մի ընդհանուր նպատակի՝ ցոյց տալ Էղիպի նման մեծ կամքի, մտքի ու սրտի տէր մարդու վերաբերմունքը կեանքի որևէ ահուելի իրականութեան հանդէպ, երբ նա խորապէս շահագրգուած է այդ իրականութեան բացադրութեամբ։ Եւ որովհետև ճակատագրի կամ դժբաղդութեան հարուածը չէ կարողանում մեոցնել հերոսի պատուասիրութիւնն ու ճշմարտութեան ծարաւը, ուստի և նրա անկումը զարմանալի վսեմութիւն ունի։

ԵՒՐԵՊԻԴ (480—406 թ.)

Զը նայած որ Էսքիլէն ու Սոֆոլլէսը բառացի չէին վերաբարտագրում կրօնական աւանդութիւնները, որոնք կազմում էին նրանց թատերգութեան միակ աղբիւրը, այլ մասսամբ ենթարկում փոփոխութեան, բայց և այնպէս աստուածների աղդեցութիւնը մեծ էր մարդկային

կեանքի վրայ: Եւրեպիդի համար, ընդհակառակն, երկնայինների դերը ձևական է լոկ, նրանց արարքները ծաղրի առարկայ. այս պատճառով էլ հասարակութիւնն սկզբում զարմանքով էր նայում այս յանդուգն մարդու պիէսներին, որոնք կործանում էին հնաւանդ կարգերի շէնքը՝ փոխարէնն առաջարկելով նուրբ դատողութիւններ, մի նոր ու անկախ բարոյականութիւն:

Եթէ այդպէս է, էլ ինչու ողբերգութեան համար նիւթ ընտրել միայն դիւցաբանութիւնից. կարելի էր ուրիշ ուղիներ փնտրել. ու Եւրեպիդը, որ խառնուածքովը բանաստեղծ էր, գտնում է մի նոր աղբեւր. դա մարդկային զգացմունքների աշխարհն էր իւր պարզութեամբ: Այժմ սէրը, ատելութիւնը, վրէժի զգացմունքը, նախանձը, եսասիրութիւնն ու ինարիգները գրաւում են հին ճակատագրի, աստուածների ու հերոսական գործերի տեղը, և տիպերն ու դէպքերը փոքրանալով մօտենում են սովորական մարդկանց՝ չնչին բայց ճշգրիտ, որոնց նմանները վիստում էին ժամանակակից Աթէնքում. ուրիշ խօսքով՝ ծնւում էր կենցաղական ողբերգութիւնը, եթէ կարելի է այդպէս կոչել: Սոֆոկլէն ասում էր, որ, եթէ ինքը նկարում էր մարդկանց այնպէս, ինչպէս որ նրանք պէտք է լինէին, Եւրեպիդը ներկայացնում էր նրանց ինչպէս որ էին:

Միւս կողմից, մարդկային կեանքը հարուստ

է մտքերով ու յոյզերով, Եւրեպիդն հետաքըրքը ըուող էր անյագօրէն. ուստի նրա գրած մօտ ութսուն պիէսը, որչափ կարելի է դատել մեզ հասած տասնիննիցը *), պարունակում են ճոխ ու այլազան նիւթեր: Նրանց մէջ կը գըտնէք ընդհանուր առասպելներ, տեղական զրոյցներ, առօրեայ դէպքեր, կեանքի դիտողութիւններ՝ բազմաթիւ զգացմունքների, ու գաղափարների հետ խառն:

Դժբաղդաբար, հէնց այդ բազմակողմանի միաքը, այդ մշտագրգիռ հետաքըրքութիւնը, քննելու, վերլուծելու անյագ տենչը վսասում են յաճախ բնաւորութեանը հերոսների, որոնք իրենց վիճակից բարձր խնդիրներով են զբաղուած, այսպէս՝ երբեմն ծառաները փիլիսոփայական դատողութիւններ են անում: Վնասում է նոյնպէս նրա ողբերգութիւնների միութիւնը. հեղինակը, իւր նպատակին դիմելիս, աջ ու ձախ է դարձնում հայեացքը. այստեղ մի դատողութիւն, այնտեղ մի ինարիդ, երրորդ տեղում ինչոր գեղեցիկ պէյզաժ կամ զգացմունք նրան շեղում են ուղիղ ճամբից:

Այդ գիտէ նաև ինքը Եւրեպիդը, ուստի՝

*.) ԾԱՆՈԹ. Դրանցից զլսաւորներն են՝ «Ալկեստիս», «Մեդեյա», «Հիպպոլիտ», «Իփիդենեան Առւլիդում», «Անդրոմաքէ», «Հեկաբէ», «Ելէկտրա», «Իփիդենեան Տաւրիդում», «Կիլոպ», որ սատիրական դրամա է, և այլն:

լուսաւորելու համար իւր պիէսների մանուածապատ ուղին՝ գործածում է մենախօսութեան կամ երկախօսութեան նման նախաբաններ, որոնց մէջ յայտնում է իւր ծրագիրը, որպէսզի պարզ լինի մեզ համար ներկայացուելիք գործողութիւնը, որ յաճախ կապ ունի նախընթաց գէպերի հետ. վերջիններս, իբր ոչ ընդհանուր աւանդութիւններ, անծանօթ լինելով հասարակութեան, կարող էին գուցէ անհասկանալի դարձնել պիէսը, որ բաղկացած էր բազմաթիւ ինտրիգներից: Օրինակի համար. «Հեկաբէ» ողբերգութեան սկզբում հրապարակ է գալիս Պոլիգորի ստուերը և յայտնում հանդիսականներին, որ նա Պըխամոսի և Հեկաբէի որդին է: Հայրը, պատերազմի ժամանակ, բաւական դանձերի հետ միասին յանձնել էր նրան Թրակիոյ թագաւորին, որ պահպանէր. բայց սա, Տրոյայի անկումից յետոյ, սպանեց Պոլիգորին և դիակը նետելով ծովը՝ իւրացրեց հարստութիւնը: Շուտով Հեկաբէն կը լաէ այդ սարսափելի լուրը, կը տեսնէ նաև իւր աղջկայ մորթուելն Աքիլլէսի շիրմի վրայ և կուլայ դառնօրէն: Վերջը ստուերն ասում է, որ մայրը կը գայ քիչ յետոյ. և իսկապէս վրանից դուրս է գալիս Հեկաբէն և տրոյացի կանանց պատմում իւր տեսած սոսկալի երազները, որոնք վտանգի մէջ են դնում որդու և աղջկայ կեանքերը:

Տեսնում ենք, որ այդ նախաբանը ծրագրի

արժէք ունի և պիէսի միութիւնը ցոյց տալու նպատակով՝ ուրուագծում է գործողութեան ընթացքը ծայրից ծայր: Սակայն զուգընթացաբար թուլանում է հանդիսականի հետաքրքրութիւնը, էլ ոչինչ էական ու նոր բան չենք սպասում պիէսից:

Նմանօրինակ արհեստական միջոցներ բանեցնում է նաև ողբերգութեանց վերջում: Հէսց որ գրութիւնները բարդ ու դժուարին են դառնում, Եւրեպիդը դիմում է աստուածների օգնութեան և հեշտութեամբ լուծում հանգոյցը: Թատերգութիւնները խաղացուում էին տօներին, կապ ունէին կրօնական հաւատալիքների հետ, ուստի երկնային զօրութիւնների միջամտութիւնը բնական և ընդունելի կը համարուէր գոնէ հասարակութեան կողմից, որովհետև գերազոյն էակների մասնակցութիւնը ոչ թէ բղխում էր հեղինակի հաւատից, որ նա չունէր բնաւ, այլ գործադըրւում էր անել վիճակներից դուրս գալու համար, ինչպէս որ կը տեսնենք շուտով՝ Մեդէյան վերլուծելիս: Իսկ առ այժմ անհրաժեշտ է դեռ մի քանի խօսք էլ ասել Եւրեպիդի խմբերգի մասին:

Արա դերն այնքան չնշն է գործողութեան մէջ և շինծու, որ, եթէ ընդունուած կարգերը չը լինէին, գուցէ նաև հէսց ինքը բանաստեղծը կը ճատէր ամբողջովին: Միայն թէ, առանձին վերցրած, այդ խմբերգը պարունակում է քնարական սքանչելի պատկերներ, զգացմունք-

ներ ու մտքեր, որոնց մէջ իրականութիւնից քաղուած նկարագրութիւնները մանաւանդ գրաւում են կարևոր տեղ:

Այժմ արդէն հասկանալի է, որ Եւրեպիդի հակումները նրան դարձնելու էին շրջապատը դիտող, կասկածի խոշորացոյցը ձեռքին՝ կեանքը վերլուծող: Աստուածների, կանանց և հասարակութեան որոշ դասակարգի մարդկանց նկատմամբ ունեցած ատելութիւնն ու հեգնանքը հետևանք են այդ հիմնական յատկութեան, որին նպաստում էր նաև նրա անհամբոյր բնաւորութիւնը:

Եւրեպիդը ծնուել է Սալամինում, մի աննըշան յարկի տակ, 480 թուին, հէնց պատերազմի օրը: Փորձել է դառնալ ըմբիշ, նկարիչ, ճարտասան, իմաստասէր, աշակերտել է Անակսագորին ու Հերակլիտին, բայց վերջը նուիրուել է թատրոնին՝ ապրելով մեկուսացած ու տրտում: Նրա ողբերգութիւններից հազիւ մի քանիսն են մրցանակ ստացել: Աւելի բաղդաւոր չէ եղել նաև նրա ընտանեկան կեանքը. նա ամուսնացել է երկու անդամ, բայց ընտրութիւններից ոչ մէկը յաջող չէ եղել: Նրա միակ հաճոյքն էր ընթերցանութիւնը, ունէր նոյնիսկ սեփական մատենադարան, որ պարունակում էր յունական գրականութեան ընտիր արտադրութիւնները: Եւրեպիդի կեանքի վերջին տարիներն անցել են Մակեդոնիայում, ուր նրան հրաւիրել էր Արքե-

յայոս թագաւորը: Պատմում են, որ, 406 թուին, այնտեղ շները պատառոտել են նրան 75 տարեկան հասակում: Հէնց որ լուրն հասաւ Աթէնք, ծերունի Սոֆոկլէսը պահանջեց, որ այդ օրը գերասանները, իւր «Եղիպը Կողոնում» ներկայացնելիս, առանց պսակի դուրս գային բեմ:

Իրօք, որչափ էլ տարբեր լինէին այս երկու ողբերգուները, որչափ էլ բարձր ու անդորր լինէր Սոֆոկլէսի հանճարը, այնուամենայնիւ զուրչէր, որ վերջինս յարգել ուզեց իւր արուեստակցի յիշատակը, որովհետև մեծ էր նրա ցոյց տուած ծառայութիւնը թատերգութեան: Եւրեպիդը նոր տարբեր էր մտցրել ողբերգութեան մէջ. սովորական զգացմունքների ու կրքերի մերկ և յուզիչ աշխարհն էր բաց արել: Ծնողների գուրգուրանքը զաւակների նկատմամբ, քոյրերի ու եղբայրների փոխադարձ սէրը, ամուսինների խանդաղատանքը և սրտի բոլոր բնական քնքշութիւններն արտայայտել էր նա նըրբութեամբ, առանց մոռանալու նաև սոսկալի կրքերը, որոնք անսանձ փոթորկի նման տապալում են ամեն ինչ, որ հանդիպում է ճանապարհին: Կեանքի մանրակրկիտ դիտողութիւնների վրայ հիմնելով իւր պիէսները՝ մի կողմ էր թողել նա երկնային զօրութիւնների մասնակցութիւնը, փոքրացըրել խմբերգի գերը, սահմանափակել աւանդական թեմաների մենաշնորհը, և այս պատճառով էլ անխուսափելիօրէն ընկել էր երբեմ

նաև հասարակ ու անհետաքրքիր նիւթերի մէջ։ Վերջապէս նա գործածել էր զմայլելի ոճ՝ հարուստ, կենդանի ու վառվուռն, բոլորովին համապատասխան իւր հերոսներին, որոնցից համակրելի կանանց տիպերը մի առանձին հրապոյր ունին իրենց միամիտ նազանքով. այդպիսիներից են իփիգենեան, Ելէկտրան, Անդրոմաքէն և ուրիշները։

Տեսնում ենք, որ Եւրեպիդի գեղարուեստական հայեացքները բաւական մօտենում են մեր այսօրուայ կարծիքին թատրոնի մասին։ Առանց հասնելու իւր նախորդների բարձրութեան, նա լրացնում է նրանց աչքաթող արած մասերը և այսպիսով նոր հորիզոններ բաց անում թատերգութեան համար, ուր նա կատակերգութեան տարրեր էր մացրել իւր կենսակրկիտ հեգնանքով. բայց այդ մասին յաջորդ գլխում կը խօսենք։ Իսկ մինչ այդ՝ մեզ մնում է դեռ քննել Մեդէյան, որ հեղինակի ամենալաւ շարադասած ողբերգութիւնն է։

Գործողութիւնը կատարւում է Կորնթոսում, պալատի առջև. երգչուհիների խումբը բաղկացած է տեղացի կանանցից։

❖ Յասոնը արգոնաւորդների գլխաւորն էր. Մեդէյան, որ Կոլքիդայի արքայադուստրն էր, օդնել էր նրան ոսկեգեղմը ճարելիս, ու պըսակուելով հետը՝ գնացել Յունաստան, որտեղ էլ միջոց էր տուել ամուսնուն վրէժ առնելու

Պելիասից. վերջինս Յասոնի բացակայութեան ժամանակ խլել էր սրա գահը։ Շուտով սակայն այդ մարդը թողնում է Մեդէյային, որից երկու զաւակ ունէր, և ամուսնանում Կորնթոսի Կրէոն արքայի աղջկայ հետ։ Հենց այս տեղից էլ սկսում է պիէսը։

Մեդէյան իւր ախոյեան կնոջն ուղարկում է մի թունաւոր շապիկ, իսկ նրա հօրը՝ մի նոյն պիսի պսակ. հայր ու աղջիկ մեռնում են այդ մահացու պարզեներից։ Այսուհետեւ նա սպանում է իւր որդիներին, որոնց քնքոյշ դիակներն անգամ չէ տալիս Յասոնին՝ համբերելու գոնէ վերջին անգամ, և մի կախարդական կառքի մէջ նստած՝ թոչում է Աթէնք։

Նոյնիսկ այս հակիրճ բովանդակութիւնից պարզ երևում է, որ պիէսի գլխաւոր անձնաւորութիւնն է Մեդէյան։ Նա սիրել էր իւր ամուսնուն, սպանել տուել նրա թշնամուն, թողել հայրենիքը և եկել Յունաստան. ապա ուրեմն գործով ցոյց էր տուել իւր անձնագոն սէրը։ Բայց յանկարծ այդ ամուսինն ինչոր փառասիրական նապատակներից զրդուած՝ դաւաճանում է նրան։ Անմիջապէս Մեդէյայի սէրը փոխում է ատելութեան։ Մի կողմից՝ յուսախաբութիւնն է նրան մզում վրէժ լուծելու այդ ապերախտ ու ապիկար մարդուց, միւս կողմից՝ նախանձն է բորբոքում նրա ոխը. ի՞նչ, ուրեմն ի՞նքը պէտք է թշուառուանօգնական թափառի այս ու այն կողմ,

իսկ նրա տեղ բոնող կինը հանգիստ ու երջանիկ ապրի Յասոնի հետ՝ գուցէ նոյնիսկ ծաղրելով նրան:

Բայց Մեդէյան սովորական թոյլ ու երկշոտ կանանցից չէ. նա ինքն իւր տէրն է: Եթէ մինչև հիմայ զարմանալի կորով ու վճռականութիւն էր ցոյց տուել սիրոյ մէջ, այժմ էլ ատելութեան մէջ կարտայայտէ իւր ոյժը՝ դիմելով բոլոր միջոցներին, լինի կանացի խորամանկութիւն, կեղծելու շնորհք և ահոելի անգթութիւն: Յասոնի յանցանքը հասարակ չէր, ոչ էլ ինքը մի վախկոտ կին, ուրեմն և պատիմն էլ կըլինի արտասովոր: Մի հարուածով վերջ տալու չէր այդ մարդու կեանքին, բայց նաև տանջանքին, ոչ. չնչին է այդ ծրագիրը. աւելի լաւ է, սպանէ նախկինին ու նրա աղջկան, և ապա էլ մորթէ իւր հարազատ զաւակներին, որոնց հայրը, մնալով առանց կնոջ ու ժառանգների, կարող է ապրիւ, եթէ ցանկալի կը համարէ այդ:

Սակայն Մեդէյան խանդավառ կերպով սիրում էր իւր երախաներին, կը նշանակէ հէնց իւր մայրական սէրը, որ խելագարօրէն չարչարում էր նրան տատանումների, խղճահարութեան ու կարեկցութեան սոսկալի յուղմունքներով, երբ սուրը ձեռքին մօտենում էր նա իւր անմեղ ու անպաշտպան փոքրիկներին, յաղթուելով նախանձի ու վրէժիսնրութեան ուժից, պատժում էր նաև այդ կնոջ, ինչպէս և ցոյց տալիս

նրա արդար զայրոյթի գերագոյն աստիճանը: Անկարելի է չընկատել ի վերջոյ, որ Մեդէյայի կախարդական կառքով հեռանալը, որ վերջաբանի տեղ է ծառայեցնում հեղինակը, բոլորովին անտեղի էր մի նմանօրինակ ողբերգութեան մէջ:

ԱՐԻՍՏՈՖԱՆ (445—386 թ.)

Նախընթաց երեք մեծ բանաստեղծների կեանքն ու գործունէութիւնը թէև չեն ընդգըրւկում յունական ողբերգութեան լրիւ պատմութիւնը, քանի որ այդ վարպետների որդիներն ու այլ մարդիկ գեռ մի կերպ շարունակում են գրել միենոյն ուղղութեան պատկանող պիէսներ, բայց մենք բաւականացանք նրանց ուսումնասիրութեամբ միայն, որ հերիք էր որոշ գաղափար տալու գրական այդ ճիւղի մասին: Այս ինչ դեռ ոչինչ չենք ասել կատակերգութեան մասին, որ ծաղկում է ողբերգութեան կողքին և միենոյն արմատից՝ Բաքրոսի պաշտամունքը:

Կոմեդիա խօսքը բաղկացած է «ուրախ ամըլոխ» ու «երգ» բառերից, որովհետեւ, գինու աստուծոյ որոշ տօներին, ժողովուրդը, ծպտած ու հարբած, ընկնում էր փողոցները և խեղկատակութիւններ անում: Հետզհետէ կրօնական նիւթերին միացան սրախօսութիւններ այս կամ այն մարդու հասցէին, զարգացան փոքրիկ թեմաներ, կծու և կոպիտ, զուարձացողների խմբից մէջ տեղ եկան մարդիկ, որոնք շնորհք ունէին ծիծա-

դեցնելու, և, դէմքերը ներկած՝ համարձակօրէն այպանեցին այն թերութիւնները, որ, առանց գինու օգնութեան, սովորական կեանքում չէին յանդզնի մերկացնել։ Այս է պատճառը, որ Եւրեպիդն, իբր մանրակրկիտ դիտողութիւնների միջոցով կեանքի ու մարդկանց արատներն ընդգծող, համարւում է աթենական կատակերգութեան ռահվիրաներից մէկը։

Դժուար է ասել, թէ Յունաստանի որ քաղաքը և Երբ է հիմք դրել խսկական կատակերգութեան, որովհետև Բաքքոսի տօնը կատարում էին շատ տեղերում, և արդէն VII դարում բազմաթիւ վայրերում գտնում ենք վերոյիշեալ ծաղրական թափօրների նման գուարճութիւններ։ Բայց և այնպէս ակնյայտ է, որ V դարում Սիկիլիան մեծ դեր է կատարել այդ ուղղութեամբ։ այստեղ էպիքարմ և Սոֆրոն բանաստեղծներն յօրինում էին փոքրիկ զաւեշտներ, որոնց և հետևեց Աթենքը՝ Սալամինի ճակատամարտից յետոյ աւելի ու աւելի զարգացնելով գրական այդ ձիւղը։

Սկզբում քաղաքներն էլ, կառավարութիւնն էլ արհամարհանքով ու խստութեամբ էին վերաբերւում կատակերգութեան, որ նրանց կարծիքով գեղջկական ու անվայել զուարճալիքի բնաւորութիւն ունէր, հետևաբար շինականներին արժանի։ Բացի այդ պատճառից, կար նոյնպէս մի ուրիշը, աւելի փափուկ. այդ շարքի

ներկայացումներն օրուայ չարիքներին, մարդկանց ու քաղաքականութեան դիաչելով՝ կարող էին անախորժութեանց տեղիք տալ և տուին, հէնց որ, դեմոկրատիայի զարգացման հետ զուգընթաց, հեղինետէ ազատուելով կաշկանդումներից, կատագերգութիւնը, մօտաւորապէս 460 թուից սկսած, իշխանութեան հովանաւորութիւնն ստացաւ՝ իրաւունք ունենալով հրապարակային մրցումների։

Գալով կատակերգութեան արուեստին՝ զրեթէ նոյնն էր, ինչոր ողբերգութեանը, քիչ աւելի ազատ ու ֆանտաստիք, հագուստները՝ գոյնըզգոյն։ Երգիչների խումբը, որ յաճախ թուշուների ծաղրանկարներն էր պատկերացնում, ոչ թէ հաշտեցնող դեր էր կատարում, ինչպէս ողբերգութեան մէջ, այլ ընդհակառակն՝ կոռւեցնող։ Բացի այդ, տաղաչափութիւնն աւելի այլազան ու կայտառ էր, լեզուն էլ մի խառնուրդ ժողովրդական պատկերաւոր բարբառի ու գրագէտ բանաստեղծի գործածած ոճի՝ համապատասխանների վիճակին։

Վերջապէս կատակերգութեան մէջ ընդունուած էր գործածելնաև «պարաբազը»։ Առաջին էպիգողից յետոյ, հեղինակը կամ խմբերգի դեկավարը դառնում էր հանդիսականներին և սրինգի ձայնակցութեամբ խօսում հեղինակի կարծիքների, ատելութեան կամ թշնամիների մասին, այն պատճառների, որոնք դրդել էին նրան

գրել իւր պիէսը, քաղաքական առօրեայ հարցերի նկատմամբ ունեցած վերաբերունքը և այլն: Այս միջանկեալ մասը կոչում էր «պարարազ», որի գործածութիւնը դալիս էր հնուց, երբ խեղկատակներն ամբոխի հետ խօսում էին իրենց գործերի մասին և խայթող բառեր ուղղում ուղան ու նրան:

Դժբաղդաբար կորել են բոլոր վարպետների գործերը. միայն Արիստոփանից են մնացել տասնըմէկ աշխատութիւն, որոնք իրենց կատարելութեամբ ցոյց են տալիս նաև նրա նախորդների և ժամանակակիցների (Քիոնիդէս, Մագնէս, Կրատինոս և ուրիշներ) մեծութիւնը միևնույն արուեստի մէջ:

Արիստոփանը ծնուել է ոչ հեռու Աթէնքից, մօտաւորապէս 445 թուին: Հազիւ 18 տարեկան էր նա, երբ իւր առաջին պիէսն ստացաւ երկրորդ մրցանակ. շուտով «Բաբելոնցիներ» գլուխածքի համար դատի հրաւիրեցին նրան, որովհետեւ նա ծաղրել էր կլէոնին և ժամանակի քաղաքականութիւնը: 425-ին, առանց ձնշուելու նախորդ դատից, մտրակեց նրանց, որոնք մշտական պատերազմի կողմանկից էին («Աքարնեանք»):

Մինչև հիմայ Արիստոփանը հանդէս չէր գալիս անձամբ, այլ ուրիշների անունով էր բեմ հանում իւր պիէսները. հէնց որ ձեռք բերեց որոշ հեղինակութիւն, ազատ կերպով ասպարէդ եկաւ անձամբ, 423 թուին ներկայացնել տալով

«Ամպերը», որով դատապարտում էր նա ժամանակակից սովիեստներին: Նրա կատակերգութեանց թիւն անցնում էր քառասնից. մեզ հասածներից են նոյնպէս՝ «Խաղաղութիւն», «Գորտերը», «Թուչունները», «Ասպետներ» և այլն:

Նա մեռել է մօտ 386 թուին:

Շատերը Արիստոփանին ներկայացնում են իրը ծայրայեղ պաշտպան հնաւանդ կարգերի, այնինչ նրա երկերի ուշագիր քննութիւնն այլ բան է ասում:

Իրօք, եթէ նա Սոկրատին ծանակի առարկայ է դարձրել, գտնելով թէ նրա սրամիտ սովիեստութիւնները վկասակար էին երիտասարդութեան համար, արդեօք ինքն էլ մի առանձին հաճոյք չէր գտում, դժուար կրութիւններից դուրս գալու համար, միևնոյն տեսակի, եթէ լնդուննենք նոյնիսկ, որ Սոկրատ սովիեստ էր, սրամը տութեանց դիմելով:

Դժուար է նոյնպէս ընդունել, որ նա խորին համոզմունքով ու մանրամասնօրէն կշռադատած փաստերով է յարձակուել¹¹ Եւրեպիդի վրայ, որը ժամանակի ամենամեծ ողբերգուն էր. այդ գիտէ նաև ինքը Արիստոփանը, որ մեծապէս օգտուել է նրա ոճից ու ոգուց և կարևոր համարել համեմատել նրան Էսքիլէսի հետ՝ նախապատռութիւն տալով Պրոմեթէսի հեղինակին: Նրա կարծիքով, Եւրեպիդն, այլանելով աստուածներին ու ճղճիմ տիպեր գուրս բերելով

բեմը, փշացնում էր նոր սերունդը. բայց չէ որ ինքն էլ «Գորտերը» և «Թոշունները» պիեսների մէջ հեղնում էր Բաքքոսին, Հերկուէսին ու Զեսին։ Այնպէս որ Եւրեափիդն ու Սոկրատը մեղաւոր չէին, եթէ աստուածներն այլ ևս պատկառանք չէին ներշնչում մտածել գիտցող մարդկանց։ Եւ յետոյ դժուար է ապացուցանել, թէ Արիստոֆանի պիեսներն աւելի՞ կրթիչ էին, քան մեծ փիլիսոփայի կեանքն ու վարդապետութիւնը, կամ թէ Մեդէյայի հոչակաւոր մենախօսութիւնը զաւակներին մորթելուց առաջ։

Աւելի ճիշտ կը լինի ասել, որ նա, իբր կատակերգու, ստիպուած էր դիտմամբ կամ բնագդով խիստ հակապատկերներ ստեղծել։ Եթէ այդպէս է, ներկան կըստանայ պախարակելի կերպարանք, անցեալն էլ՝ տենչալի։ Զեսը, արիստոկրատիան ու Էսքիլէսը կը լինին պատկառելի, իսկ Սոկրատը, դեմոկրատիան ու Եւրեափիդը՝ վասակար ու ծիծաղելի։ Որքան նշանաւոր լինէին իւր ընտրած ժամանակակից դէմքերն ու հարցերը, այնքան աւելի ուշագրաւ կըլինէր պիեսը, մանաւանդ որ կատակերգութիւնը սիրում է չափազանցութիւններ, դա իւր ոգին է և արդարացուցիչ պատճառը։

Այժմ արդէն կարելի է որոշ տեղ էլ տալ հեղինակի ցոյց տուած համակրանքին հին կարգերի նկատմամբ։ Կարելի է յիշատակել նաև նրա երիտասարդական տաքարիւն բնաւորութիւնը,

յաղթահարելու փափագը, ծիծաղելու և ծիծաղեցնելու շնորհքը, ինչ անենք թէ երբեմն հակասութիւնների մէջ ընկնէր, ու կստանանք Արիստոփանի դիմանկարը։ Կատակն ու լուրջը հաւասապէս հետաքրքրում են այդ մարդուն, որ թէ ցինիք էր և թէ բարոյագէտ, առանց մոռանալու փառքի տենչը։

Նրա նիւթերն էին ժամանակակից քաղաքականութիւնը, բարքերը և գեղարուեստի ու մտքի նշանաւոր ներկայացուցիչները։ Ուստի, երբ մարդ մի կողմ է թողնում Արիստոփանի երգիծական չափազանցութիւնները, նրա երկերի մէջ գտնում է այն շրջանի Աթէնքի կեանքից քաղուած հարուստ դիտողութիւններ։ Իշխանաւոր, փիլիսոփայ, բանաստեղծ, քաղաքացի, գիւղացի, միամիտ թէ խորամանկ, բոլորը, խառնիխունն, ծիծաղելով, աղմկելով, դատելով, շարժուն ու կայտառ, հանդէս են դալիս, երգում խենթ ու խելացի երգեր, որոնց միանում են նաև թոչունների կերպարանքներ, արտայայտում են մտքեր, ցնդաբանում նոյնքան շատ, որոշ նպատակի ձգտում մեծ կամքով, յաղթում են դժուարութիւնները և յետոյ նորից անյայտանում, իրենց յետեկից թողնելով երփներանգ պատկերների, գաղափարների, դիմակների, թէթևոլիկ երգերի ու ժեստերի մի ամբողջ կախարդական աշխարհ, որ այնքան նման է հին Աթէնքին և թէ տարբեր, որովհետեւ հեղինակն ընտրել ու

շարադասել է իւր նիւթերը՝ հետևելով կատակերպութեան մուսայի ձայնին:

Այդպիսի պիեսներից է, օրինակի համար, «Թռչունները», որի համառօտ բովանդակութիւնն իսկ հերիք կը լինի ցոյց տալու Արիստոֆանի ծաղրածու աւիւնը:

Երկու աթենացի՝ Պիսետերն ու Էվլիպիդը՝ ձանձրացած քաղաքի դատերից ու ճառերից՝ գընում են և, բնակութիւններից հեռու, հաւաքում թռչուններին: Երկար բարակ ճվճվոցներից յետոյ, համաձայնութեան գալով՝ շինում են մի քաղաք ժայռերի մէջ և կոչում Նեփելոկոլիզիզիա: Մարդիկ գտնւում են նրանց ոտքերի տակ, իսկ աստուածները՝ վերևում: Շատ չանցած՝ հերթով գալիս են մի կրօնաւոր, մի բանաստեղծ, մի գուշակ, մի երկրաշափ, մի վերստուգիչ և մի հրովարտակավաճառ՝ կարծելով թէ լաւ գործ կունենան այս նորակառոյց տեղում: Պիսետերը բոլորին էլ ծեծում է փայտով ու ճամբայ ձըգում: Բայց նոր բաղդախնդիրներ են համնում նրանց մեկնելուց յետոյ՝ մի լրաբեր, մի հայրասպան, բանաստեղծ կինեսիասը և մի մատնիչ: սրանք աւելի բաղդաւոր չեն լինում:

Այսուհետեւ աստուածներն են պատուիրակներ ուղարկում այս զարմանալի քաղաքը, որ նրանց զօրութեան սպառնում էր կարծես: Դրանք են իրիսը, Պոսեյտոնը, Հերկուլէսը, Պրոմեթէոսը և ինչ որ ապուշ՝ Տրիբալ անունով, որոնք մտնում

են բանակցութեան մէջ. Պիսետերը շահագործելով չերկուլէսի անկուշտ քաղցն ու Տրիբալի անմըտութիւնը՝ իւրացնում է Զեսի թագաւորութիւնը, դառնում աշխարհի բացարձակ տէրը:

Նոյնքան սրամիտ է նաև «Ամպեր» կատակերգութիւնը, որի նպատակն է եղել մտրակել նոր դաստիարակութեան եղանակը, մանաւանդ սովեստների ճարտասանութիւնը: Ճիշտ է, նրա մէջ աղաւաղւած է Սոկրատի դէմքը, բայց պիեսի էութիւնը մնում է միշտ էլ խորապէս զաւեշտական:


Իբր թէ յոյն փիլիսոփան կողովում նստած է՝ օդի մէջ կախուած. Նրա աստուածներն են ամպերն ու քամին. Զեսը ճնշւում է սրանց զօրութեան առջև: Սոկրատի այդ կացարանի անունն է «Մորքի խանութ»: որտեղից դաստիարակութիւն է ստանում երիտասարդութիւնը:

Այդտեղ է գալիս մի միամիտ ու աշխատասէր գիւղացի՝ Սոկրատիադը, որ իւր շուայլ որդու պատճառով ընկել էր մեծ պարտքերի մէջ. նա ուզում էր Սոկրատից սովեստութիւն սովորել, որպէսզի արդարանար պարտատէրերի առջև: Բայց որովհետեւ այդ հասակաւոր ու բարի աշակերտն անընդունակ է գուրս գալիս, ուստի համոզում է իւր որդուն, որ գոնէ սա զնայ, իւրացնէ դատողութեան արուեստը: Սոկրատը նըրան յանձնում է Արդարին և Անարդարին, որպէսզի կրթեն նրան. ի հարկէ Անարդարը, որ նոր դաս-

տիարակութեան ներկայացուցիչն էր, սովորեց-
նում է նրան իւր շնորհքը: Հետեանքն այն է
լինում, որ այդ երիտասարդը, պարտատէրերին
ճամբայ ձգելուց յետոյ, դեռ մի լաւ էլ ծեծում է
հօրը, որովհետեւ սա համարձակել էր եսքիլէսին
գերադասել Եւրեպիտից, և իրաւունք ունէր ծե-
ծելու. եթէ ծնողները պատժում են իրենց որ-
դոց, նրանց նպատակը բարի է անշուշտ. արդ, ին-
չու միենոյն ձգտումով զաւակը չըպէտք է ծե-
ծէ իւր հօրը: Վերջինս՝ բարկացած գնում է,
այլում «մորի խանութը»:

Դիւցազներգութեան, քնարական բանաս-
տեղծութեան և թատերական գրուածքների կող-
քին, Յունաստանում ծաղկել են նաև պատմա-
կան (Հերոդոտ, Թուկիտոս, Քսենոփոն), Փիլի-
սոփիայական (Սոկրատ, Պլատոն, Արիստոտէլ),
հոետորական (Անտիֆոն, Իսոկրատ, Դեմոսթեն)
և այլ շարքի բոլոր միւղերը. այնպէս որ սկսած
Հոմերոսից մինչև IV դարի վերջը (Քր. առ.) Յու-
նաստանն իւր գիտական ու գեղարուեստական
երկերով հիմք է դրել արդի քաղաքակրթութեան,
բայց այդ մասի քննութիւնը դուրս է մեր ծը-
րագրից:





ՀՀ Ազգային գրադարան



NL0317556

9040

88.09
11-33